

መድረሰት ዓም-ሕክምነ ወሕክምነ አንድነት እርቱ 56 ደረሰ ተድሕር



መድረሰት ዓም ሕክምነ ወሕክምነ አንድነት እርቱ፡ እት የም 12 ጃንዋሪ እግል 8^ይ ወክደ ዲብሊ

ወዴተ ዓደት መድሐራት 56 ደረሰ እብ ዶክተረይት አድሐረት። ዲብሊ መናሰበት ካሰላሙ

እበ ህለው አምር ወእክእሉላሙ ለህለው ተጃርብ እብ ልብ-ናሴሕ ወመትሰባል እግል ልክደም

ቀሰም እግል ልክረው ክምሰል ቀድረው፡ 43 እብ ዓም ሕክምነ 13 ህዬ እብ ሕክምነ አንድነት ቶም ለትደሐረው።

ወዚረት ዓፍየት አሚነ ኑርሕሴን ዲብሊ ቀደመተ ከሊመት፡ ዲብ ጠወርት መቅደረት አዳም ለጉብእ እስትሰማር ዐድነ ዲብ መጃል ዓፍየት እርኢቱ ለህሌት ዐውቲታት ዝያድ ወቀይ ክምሰል ቱ እንዴ አሸረት፡ መትድሕረት አሰርሊ ቀደምም ለትደሐረው ሐምም ወሐዋቶም እንዴ ተለው፡ ልታከዮም ለህለ ወቀይ ፈዳብ እብ መትሰባል እት ፍዕል እግል ለአውዕሎ መስኢት ክምሰል ጉብእ እቶም አትፋቀደት።

ለሐሰው ሰብ መቅደረት ዓፍየት አፍረየት ምን አግደ ወራታት በራምጅ ብነ ወዐማርቱ ለበለ ዐሚድ

ኩልየት ዓም ሕክምነ ወሕክምነ አንድነት እርቱ ሴድያይ ፕሮፌሰር የማኔ ሰዩም፡ ለመድረሰት ምን ትትአሰስ 285 እብ ዓም ሕክምነ፡ 35 ህዬ እብ ሕክምነ አንድነት ክምሰል አድሐረት እብሊ ህዬ፡ ለዲብ ሰልፍ ሰኒን ሕርየት አሮ ዶክተር እግል 37 አልፍ ሐማይም ለዐለ ቅያሱ፡ አዜ እት አሮ ዶክተር እግል 16 አልፍ ሐማይም ድሀር ክምሰል ህለ ወደሐ፡ ዲብ ደንጎበ ወኪል መትድሕረት፡ ባጽሓመ ለህለው ደረጃት ክእልልት ፍገራት ናይለ ሕክመት ለትወድዩ እስትሰማር፡ ጸገም-ዋልዴን፡ ክምሰልሁመ ናይ መደርሲን መትአያሰ ክምሰልቱ እንዴ አሸረ፡ ለልታከዮም ወቀይ እብ መትሰባል እግል ልሰርግሎ ገጽ ቀደም ክምሰል ዋልዮም ወደሐ።

አሰመረ፡ ዲብ መደበር ብቆት ነድ ሳደፈት

እት አሰመረ አትኒን የም 14 ጃንዋሪ ላሊ እት ከርስ መደበር እበ ሳደፈት ብቆት ነድ እት መምተለካት መደረት ጀሬት።

እት አቅሊም ምግብ መስኡል ውሕደት ዓፍየት ነድ አሰይድ ዐንዱብርሃን ተወልዴ፡ እብ ክሰሰለ ነድ ሐብሬ ሐቆለ በጽሐቶም፡ ምን ሳዐት 2:30 ላሊ እት አካን ክምሰል በጽሐው ወነድ ድቁብ ክምሰል ጸንሐዮም እት ሸሬሕ፡ እብ ሐምስ መካይን መቅሰነት እሳት አሰክ ሳዐት 8:00 አሰቡሕ እበ ገእ ጅህድ፡ ለነድ እብ ከማሉ እት ሐንቴ መራቀቡት ክም አተ ሐበረ። እበ ብቆት፡ እት አዳም

ለጀሬት መደረት አለቡ።

ሸቃለ መደበር እግል ኤሪና እት ሀበወ ሐብሬ፡ እትሊ እብ ነድ ለቀሀመ ድዋራት፡ ቀደም እላመ ክልኤ ኢነት ሕድ ለሸብህ ብቆት ሱዱፍ ክምሰል ዐለ እት ሸርሐ፡ ወራታት ነጃረት ወሕዳደት እብ ሕበር ለጉብእ እቱ ምን ገኡ፡ አሰባብ ናይለ ነድ ህቱ እግል ልግበእ ክም ቀድር ወግም ሀበው።

ውሕደት ዓፈዶት ነድ ሳኪን፡ አሰባብ ናይለ ነድ ወቅያሰ ናይለ ጀሬት መደረት እት ወራታት ተሕቂቅ ክምሰል ህለ ሐበረት።



አሰመረ፡ ክጡጥ በላዓት አትሳናይ ጉብእ እሉ



እት መዲነት አሰመረ፡ እት መደት ከረም መሻክል ከልቅ ለዐለ ዝያድ 50 ሰነት ለከድመ ዐባዩ ክጡጥ በላዓት እብ ሐዲስ ልትበደል ህለ።

እግለ ሸቅል ታብዕ ለህለ እት ቅሰም ማይ አቅሊም ምግብ መስኡል ፈርዕ ፌሻይ-ረሳስሕት ሙሀንድሰ የውሀንስ ሙሉ እግል ኤሪና እት ሀበዩ ሐብሬ፡ ለልትሰርገል ለህለ ካድም፡ እት መደት ከረም ምን ምዴርያት ኣክርየ፡ አርበዕቱ አሰመረ ወድዋራት ገዝ-ከኒሽ እበ ልትከሬ ወሓይዝ እት ዳሕያት አባሻውል ወሱግ ለልትርኤ ተርቅ ሕሉል እግል ባሰርት ክምቱ ሸርሐ።

ለበርናምጅ እግል ልትሰርገል እዳረት አቅሊም ምግብ ኣላት ካሬ ፋ'ረት ክም ህሌት ለሸርሐ ጆሚትራ የውሀንስ ለሰኒን ረዩም ለከድመ ለአበረ ዐነድር እብ ሐዲስ ልትበደል ክምሰል ህለ ሐበረ።

እሊ እብ ተካሊፍ ብዞሕ ልትሸቆ ለህለ መሸርዕ እት ድዋራት አበሻውል ወሱግ ለትበር ሸዑብ፡ ግማመት ናሽፈት እግል ኢልክሬ እቱ አትፋቀደ።

ሙዲረት ምዴርየት አባሻውል አሰይደ ሳረ ተሰፋሚካኤል እት ሀበተ ሐብሬ፡ ሰካን አሀምየት ናየ ካድም እንዴ ፈሀመው፡ መርዲት ሰኒ እግል ሊደው እቱ ትፋኔት።

እሊ ሰኒ ለህለ ክጡጥ በላዓት፡ እምበለ እት መደት ከረም ሳድፍ ለዐለ ተርቅ እት አንቀሶት ለቡቱ ዶር፡ እት ዓቅቢት ነዳፈት መዲነት ወሕፍዘት ዓፍየቶም'መ ተረት ዛይደት ክምሰልቡ ለሐበረው ሰካን፡ እት ብዕድ ድዋራትመ እግል ልተላሌ ትወሰው።እት ሸቅል ለትፈረረው አንፋር፡ ሸዑብ እበ ወድዩ ህለ መትዓዋን፡ እት ሰርገል ወራታቶም ተረቱ ዐባይ ክምተ ሸርሐው።

ምጅልስ አቅሊም ግብለት 18^ይ ርቱብ እጅትምቡ ሰርግል



ምጅልስ አቅሊም ግብለት 18ይ ርቱብ እጅትምቡ ዲብ ሞም 9 ጃንዋሪ ዲብ መዲነት መንደራረ ሰርግል።

ርኢሰለ ምጅልስ መምህር ወልደይ ገብረ ዲብለ ቀደመዩ ሸራሕ፡ ነኦቴ እተ ለህሌነ መርሐለት እግል ክል መዋጥን መስኡልየት ዐባይ ለተክረፊ ሰበት ገብአት፡ ክሉ ዲብለ ትፈረረ እቱ ዳይ እብ መትኢያስ እግል ልክድመ ክምሰል ወጅብ ወደሐ።

“ሰላም አሳስ ዐማር ወዐትተ” ለቤለ መምህር ወልደይ፡ ዲብለ ሐልፈ ሰኒን እብ ሰብብለ ዐለት ኢሰላም ወኢሐርብ ትኩል ለዐለ በራምጅ እብ ዋጅብ እት ፍዕል እግል ልውዐል ወሩእየትን እግል ትትመም እልን እግለ ሀለ ተሐድያት ክምሰል ኡብነት እንዴ ትነፈዐን እብ ዕጹፋት እግል ነኦውቁ ክምሰል ወጅብ ወደሐ።

ዲብለ መናሰበት፡ መስኡሊን አፍረዐት፡ አቅላም እዳረት አቅሊም

ግብለት፡ ደዓም እት መዓል ለወዐለ ወኢወዐለ በራምጅ እብ መጅብለ ዋጅህ ለዐለ ሐዋን ወብቆፅ ጀዋንብ እንዴ ትጌመመ፡ ዲብ እለ ሰነት እለ እግል ልግበእ ለትሰተተ በራምጅ ከክም አውለውያቱ እብ ተፋሲል ቀርቡ።

ሓክም አቅሊም ግብለት አሰይድ ኤፍሬም ገብራክርስቶስ ዲብለ ቀደመዩ ናይ መከምከሚ ከሊመት፡ ለህሌነ እተ መርሐለት ዲብ ክሉ መጃላት ዝያደት ጸገም ወመትዐጸም ሰበት ጠልብ፡ አንፋር ምጅልስ ሜርሓይ ዶሮም እግል ለአውፋ አትፋቀደ።

“አድረሶት አዋልድ፡ አድረሶት መጅተመዕቱ” ለቤለ አሰይድ ኤፍሬም፡ መሻረከት አዋልድ ዲብ ዐግሎ ተዕሊም ወሸቅል እግል አደቀቦት አውለውየት እንዴ ተሀየቦዩ እግል ልትከደም እቱ፡ እብ አሳስ እብ ውዛራት ሕኩማት አቃሊም ወዐድል ለፈግረ ቀዋኒን እትፋቅ ክራይ፡

ፍንጌ መትከርያይ ወመከርያይ ለልትረኤ አክይመቅሬሕ እግል ሀውኖት ለገብእ ጅህድ እግል ልትደቀብ፡ መድረሰት ሐረስቶት ዲብ ገርህት ሐረስታይ ዲብለ ሐጭረ ወክድ እግል አሰተብደየት እብ እህትማም እግል ልትሸቁ ዲብለ ልብል አጃንዳት ፋይሕ ተውዴሕ ሀቤ።

ዲብ ደንጎበ ምጅልስ አቅሊም ግብለት፡ መዐዩ ለአሳሱ በራምጅ ነዳፊት ድዋር እግል ልትከደም እቱ፡ መትነፊዕ መጎጎ አድሐነት እብ ፋይሕ እግል ልትከደም እቱ፡ ዲብ መአሰሳት ዓፍየት መታከዩ ዐመሲ ለአለቡ እግል ልትሸቁ እቱ፡ እብለትፈናተ አሰባብ ዲብ ዐግሎ ተዕሊም ለኢህለው አጀኒት ወሸግን ዲብ መዳርሰ ለሻርቡ እብ ቴለል እግል ልትከለቅ፡ ወራታት ሕፍዘት ማይ ወትርበት እበትወቀለት ደረጀት እግል ልተላላ ለልብል ውበዕድ ቀራራት ወፊናታት ሓለፈ።

ሐልሐሌ፡ ወራታት በሐሰ ሐርሰ ገብእ

መአሰሰት ብሐሰ ሐርሰ ሐልሐሌ፡ እተይ እግል ልዕቤ ለገብእ ወራታት እበ ሐሰት ገበይ እግል ልትከደም እቱ ክምቱ፡ ዲብ ሞም 10 ጃንዋሪ ዲብ ገብእ እጅትመዕ ሸርሐት።

ዲብ መስኡሊን አፍረዐት ውዛረት ሐርሰ ዲብ አቃሊም፡ እተ ክምሰልሁመ ባሕሊን ወሰብ መቅደረት ሐርሰ ለሐድረዉ

እጅትመዕ፡ ሙዲር ዓም ናይለ መአሰሰት አሰይድ ጸጋይ ብርሃኔ ዲብ አሰምዐዩ ከሊመት ለገብእ ሸቅል እግል ልትጠወር ወእብ ኢንተርኔት እግል ልትሰዴ፡ እብ መዓወነት ውዛረት ሐርሰ ልትከደም ክም ሀለ ሸርሐ።

እተ እጅትመዕ፡ እት ብሐሰ ሐዋናት፡ ዘርእ፡ ሀንደሰት፡ ሕፍዘት ዘርእ ወቲሹ ካልቸር፡ ተዋብ ሐ

ሐሊብ፡ ረዘቀት ፍገሪት ሐሊብ ወሰን፡ እተ-ክምሰልሁመ ዲብ ሕፍዘት ጅንሰ ሐዋናት ናይለ ገብእ ወራታት ተቃሪር ትቀደመ ወህድግ ገብእ እቱ።

እብ አሳሰለ ተቃሪር፡ ዲብ አቃሊም ምግብ ወግብለት እግል ሐረስቶት ልትሀየብ ዘርእ ሸንራይ ወድንሸ፡ ዲብ መራክዝ ሸዕብ፡ ገሉጅ፡ሻምብቁ፡ ሐጋት ወገሕቴላይ ለትሀየብ ዘርእ ማሼሉ፡ ብልቱብ፡ ባምየት ወተመር፡ ዲብ አቁርደት ለትወዘዐ ዘርእ ድንሸ፡ በናኑ ሸጠ ወተመር፡ እተ-ክምሰልሁመ ዲብ ክሉ መራክዝ ሸትል ለትሰርገለ ወራታት ወአትጃናስ ለልትመደድ ዘርእ ፍገሪት ክም ትረከበት እቱ በርህ።

ወዚር ሐርሰ አሰይድ አረፋይኔ በርሄ፡ ዲብ ቀድመዩ ልእከት፡ ብሐሰ ሐርሰ እግል ልትጠወር ወሰብ ምህነት ላቶም ሸባብ እግል ልፍረው ለገብእ ወራታት እብ ተፋሲል ሐቆ ሐመደ፡ ዲብ መጽእ ወክድ ገጽ ቀደም እግል ልሄርር፡ ለሀለ እነ አርዛቅ ምሰል መካሰቡ ወተሐድያቱ ዲብ ከራጠት እግል ልትረሰም ወልትከደም አትፋቀደ።

ኣውሰትራልዩ፡ መህረጃን ኤሪትሮፖን ትከሰተ

ማህረጃን ኣርትሮፖን ሰነን ኣውሰትራልዩ፡ ምን ለትፈናተዩ መዳይን ለትወከለው መዋጥኒን ወጋሽ እተ ለሐድረው ዲብ መናሰበት፡ ሞም 11 ጃንዋሪ እብ ወጠንየት ድቅብት ትከሰተ።

ቁንሰል ዓም ኤሪትሮፖ ዲብ ኣውሰትራልዩ ወኒውዚላንድ አሰይድ መሓሪ ተከሰቱ፡ እግለ መህረጃን እብ ረሰሚ እንዴ ከሰተ እተ ለአሰመዐዩ ከሊመት፡ ናይ ሰነት 2019 መህረጃን ሓለት ኢሐርብ ወኢሰላም፡ እብ መዓወነት እተ ለትበደለት ዲብ ወቅት ገብእ ሰበት ሀለ፡ ግማለት ፍንቲት ክም ለሀይቡ እንዴ ሸርሐ አሰናይነ ቤለ።

እት ሰድት ወመራር መደት፡ በራምጅ ዐማር ለሰርገለው ሸዑብ ወሕኩመት ኤሪትሮፖ፡ ዲብ ወቅት ረሀየት ወሰላም ወጠን እግል ልብነው ወለዐምሮ ለትከርዖም ክምሰል አለቡ ለሸርሐ አሰይድ መሓሪ፡ መህረጃን ጅንሰዩት ወጠንየት እንዴ አደቀብ፡ ዲብ ነባሪ መጅተመዕነ እንዴ ሓፈዝን ዲብ አጅያል እግል ነኦትሐላልፋ መስኡልየት ለተክረፊ መርሐለት ሰበትተ፡ ለአንፋር

ጃልየት ኤሪትሮፖን እብ መትሐሳር እግል ልሸቀው ዲብ አትፋቀደ።

ርኢሰ መመቅረሓይት ልጅነት ዓያድ አሰይድ ሳምሶም አማንኤል እብ ተረቱ፡ ተረት ወመሻረከት መዋጥኒን እተ ለሐልፈ ኣውቃት ወአሀምየቱ ሐቀለ ሸርሐ፡ ሰታት በራምጅ መዳፈዐት ወዐማር እግል ዐውቶት፡ ምኖም ለልትጠለብ ዋጅባት እግል ለአትምሞ መትዳላዮም አከደ።

እምበል እሊመ፡ ወካይል እዳራት ሕኩመት ሺክቶርየ ወመሳኒት ኤሪትሮፖን ናይ ተእደድ ከሊማት አሰመዐው።

ዲብ መህረጃን፡ እግል አርዛቅ ወዓዳት ኤሪትሮፖን ለሸራሕ ናይ ሰወር ዕፊ፡ ለዲብ ኤሪትሮፖ ፍሩድ ለዐለ መኒዕ ዝልም እግል አፍሸሎት ለገብእ ግድለ ወለትረኦ ኤማን ወሰባተት፡ ክምሰልሁመ እግል ታሪክ ሸዑብ ኤሪትሮፖ ወመታክሉ፡ ግድለ ጀላብ ሕርየት ወሰላደፈ ወራራት ዛህር፡ ወመዳፈዐት ሸዑብ ኤሪትሮፖ ለሸራሕ ጽበዋ ትቀደመ ዲብ።



እሰራኤል፡ ሰዳይት ዓይላት ሹሀደእ ትተላሌ

ዲብ መሕበር ፍኖቱ ሰማእታት እንዴ ትከምከመው ለሸቁ ኤሪትሮፖን ሰነን እሰራኤል፡ ዲብ ሰነት 2019 ዓይላት ሹሀደእ ናይ ራዐዮት በራምጅ እበ ትወቀለት ክምሰል ከድሞ እቱ፡ ዲብለ ወደዉ እጅትመዕ ሸርሐው።

እብ አሳሰለ ቀርብ ተቅሪራ፡ ዲብ ሰነት 2018 ለትነዘመው ሐዳይሰ ሐድ 100 አንፋር ክልምኖም 720 ዶላር እንዴ ደፍዐው፡ ዝያድ 72 አልፍ ዶላር እግል ራዐዮት ዓይላት ሹሀደ እግል ልውዐል እብ ገበይ ውዛረት ዐመል ወራዐዮት እጅትማዕዩት ልልእኮ እት ህለው፡ ናይለ ራዐዖም ዓይላት ሹሀደእ ሐብሬ ታመት ህዩ ተሀየቦዮም።

ምሽተርከት ዲብ ደንጎቤ ወጠንያይ በራምጅ እበ ተኣደሚዕ እት ፍዕል እግል አውዐሎት ክምሰልሁመ ዓይላት ሹሀደ እግል ራዐዮት እግል ሕኩመት ሌጠ ለልተረክ ሰበት ኢኮን፡ ዝያደት ናይ ደሚር ገናዐት ሰበት ክልቅ እቶም መትነዛሞም ወመትከምካሞም እንዴ አደቀበው ክምሰል ሸግቦ አከደው።

ጸረትርየዐጸዳክ

ክል ኣርቡዕ ለትጠብዕ ጀሪደት

መዳልየት፦

- መሐመድ እድሪስ
- ክልሹም መሐመድ
- አድም ሳልሕ
- ሳልሕ እድሪስ

ለይኣውት ወኣርተዖት

- * ዘህረ ዐሊ
- * ፋዋነ አድም

ተለፎን፡ 121797/07121322

ፋክስ፡ 127749። ዕ.ሰ.ቡ፡ 247

ተውዝዕ ጀሪደት፦

ተለፎን፡ 200454

ኣትኣመሮት

ተለፎን፡ 125013፡ ዕ.ሰ.ቡ፡ 1284

3^ይ ክፋል

ሼክ ዐሊ ለዲብ ከረን ተሐደረቱ ዓይነት፡ ሰብ ሐ ወሰብ አጣል፡ ሰብ ዐነት ወተኮብ ዲብ ትሰአል እሉ ክልኤ ምዕል ወዴት። ዲብ ደንጎበ ህዩ ኦሮ ከበር ረክበት። እሊ ከበር እሊ ህዩ እግል ሼክ ዐሊ በሊሰ ሳብት ዐላ። እባሆም እሊ ከበር እሊ እንዴ ጸብጠው፡ እግለ ሀምገም ዲብ ልብል እት ሸቀላት ወሀማት ኩሩይ ለዐለ ሼክ ዐሊ መጽአው። ሰለሰ ነፈር እት ባኮቱ እንዴ ትገሰው ህዩ ገንሐው። ህቱ ላተ ከበር ሰኒ እግል ልሰመዕ እዘኑ ከርከዐ ወዕንታቱ አሸለማለመ ወእብ ንሳሉ ከኖፍሩ አዋለሉ፡ ወእግል ለአተንሴ ትዳለ ወሸንከተ አንፋር አቅመተ። ህቱ ከበር ናይለ ፍራሰ ሕርየት እግል ልሰመዕቱ ሸፍግ ወልትረመጭ ለዐለ። እትሊ ወክድ እሊ ደሚሩ ትረፈዐ ወትሻቀለ ሚ እግል ሊበሉኒቱ ለለብል ሀማት ቀልዩ ዐለ። እትሊ ወክድ እሊ ደሚሩ ለረይሕ ዲብ አካን እክል ክምሰል ነብረ ወዲብ አካን ማይ ክምሰል ሲቶ ሕልቅሙ ለለአጠልል እቡ ወአሰራሩ ለለአበርድ እቡ ከበር አኖከ።

“ ከ..ከ.. ከ ገድም” ቤለ አሮ ምነ አቃርቡ። እንዴ አትለ ህዩ፡ “በገ ሼክ ዐሊ አሰክ እለ ለእሉ ረኩብን እከ ከበር ሳብት ሰበት ይህሉ፡ አሰክ ዙለ ምን ተአቀብል ሐይሰ መሰለኒ። እሉም ትብሎም ለህሌክ ምሕርቦት ሕርየት ህዩ ሰሮም ኬን ሰሕል ተሓት ባካት ሕዱድ ሶዳን ወሰሮም’መ እንክር ጋሽ ወበርክ ባካት ግሉይ ወእምሐጀር ህለው ድኢኮን። እት ቃምጩ ይህለው ወእምበሀረ። አዜ ሳክት ምን ኢተአንገጌ ወአከይ ሞት ምን ኢትመይት ሐይሰክ መሰለኒ። ዲብ ቃምጩ ህዩ ቅዋት አሸዕብዩ ይህለው ቤለው” ዲብ ልብል አሮ ምነ አንፋር አሰአለዩ።

እሊ ከበር እሊ እግል ሼክ ዐሊ መውዲ ቀጢን መሰለ እቱ። እተ አካኑ ተወው ቤሉ፡ ለእለ ልብል ወለ እለ ወዴ ቀው። እብ ሐሩቀት ክምሰል ገመል-ረበዕ ከኖፍሩ ዲብ ለሐራዋጥ አዜመ ንሳሉ እንዴ አዋለለ” በደል እሊ ትቡሉ ለህሌኩም ሰለል ተሕረር ወንዳል ጸብጣም ለህለው ሙናድሊን ቴለሎም እንዴ ይእደሌ ክሉ ረአሼ አሰክ ዙለ አቀብል። እንሸአለህ ገበይ ክልኦት ሐል እንዴ ካዩድኮ ከበርም ወረአሶም እንዴ ደሌኮ አቀብል! እሊ ትቡሉ ለህሌኩም ህዩ ሐሰት ቱ” ቤለ ወሞራሁ እንዴ ነሰአ አዜመ ምነ ምግሳዩ ፍርግጽ ወደ ወእግል በገሰ ትከማከመ። ለጅማዐት ህዩ፡ “አሰክ ኢዶቱ ሼክ ዐሊ፡ እሊ እምለካቱ ለህሌኑ ከበር ህዩ ምን ቃምጩ ወእምበሀረ ለመጽአው አንፋር ቤለውናቱ ሐሰት ኢኮን። አዜ ህዩ ህግደነ ሰመዕ ወአሰክ ዙለ አቀብል አከይ ሞት ኢቲሙት” ቤለው እብ ሐቱ ክርን። ሚ እንዴ ጸበዋኮ እግል አቅብል? ሐሬ ሸዐብ ዙለ

ህዩ እሊ ክሉ ባዲ ምኖም እንዴ ዐልኮ እምበል ከበር አቀብሎም?” ዲብ ለዐንገዳግድ በልሰ እግሎም። ህቱምመ ዐረድ እለ ላተ ለእለ ልቡሉ ሴመ ይዐለት። ሼክ ዐሊ ህዩ ምነ አካኑ አሰክለ እግሩ ለተለዩቡ እትጀህ አሳደረ።

ሼክ ዐሊ ዲብ ከረንመ ከበር ናይለ ምሕርቦት ተሕረር ክም ኢረክቤ። ምነ ዐለ እተ አካን ሸንከት ቅብለት ትበገሰ። ሐር ላኪን ሐሰቤ፡ ምን እንክር ሳሕል እብ እንክር በርከ ምን አኑበት ሐይሰ ቤለ ወእባሁ ለሸንከት ቅብለት ሓሰቡ ዐለ ሰፈር፡ ሸንከት ምውዳቅ ጸሓይ መርሐዩ። እብል ጎማት እለ ህዩ፡ አሰልፍ ባካት ገሉጅ እግል ልብጸሕ ወዲቡ እግል ለአተድሌ ነወ ወእባሁ ሕኔት እብ ጸባብ አሰክ ሳሕል፡ እብ ዋንቁለሐሰ አሰክ ጋድሞታት በርከ አተጀህ። “ከበር እሉም ምሕርቦት ሕርየት ኢረኩብኩ ምንገብእ ከበርዬ ሌጠ አበዴ ዲኢኮን። እብ ሃልዬዲ ዙለ ይአቀብል” ቤለ ወምሰለ ምን ከረን አሰክ ሰነይ ልትሀርቡብ ለዐለ ባሰ ትበገሰ። ለአተቡሰ አምዕል እብ ግዲደ ምድር ጣይም ወዐለት። ምድር በርከ ሰኒ ግሩምቱ። ለፋይሕ ጋድሞታት ምሰለ ሐኒ



ከረም ለሰዐርሰዐሮ ወጋምል ዐንክል ወምድር ማልእ ለዐለ አንውየት ምሰለ ዲብ አዋራፍ መሓዛት ለህለ ሻፍቅ ወታኪ ዐርኮኩቤ እሊ ሰፈር እሊመ ሰኒ ወአማን ዐጅብዩ ወረይሐዩ። አተቡሰ ገጸ ቀደም ዲብ ትትሀርቡብ ሐቆለ ወዐለት፡ ሰነይ እንዴ ኢትበዴሕ እት ምግብ ተዐጠለት መሰለኒ። ሸት ትቤ ከሐረግረገት።

ሼክ ዐሊ አዜመ ብዙሕ ኢትሻቀሉ፡ ግደሰ እብ እገር ህዩ ሰልፋ ኢኮን። አሰክለ ኢሊአምሩ ርሒብ ጋድሞታት በርከ እብ ሄራር እገር አሌፍ ቤለ ከሸንከት ምውዳቅ ጸሓይ ሄራሩ አተላለ። ሴፋሁ ወመሰተዩ ህዩ ለምን ምዕል እት ምዕል እት ትትውሒ ትገይሰ ለዐለት ሰላዲሁተ ሌጠ። ምነ ሐዳት ግሩሹ ዲብ ተድብር ዲብ በሌዕ ወሰቱ ሰነይ እንዴ ሐልፈ ለሰርቤብል ምሕርቦት ሳምዕ እቱ ለዐለ ድጌ ገሉጅ ሐቆ ሰለሰ አምዕል በጽሐዩ። ለለትዐጅብቱ፡ ለምን ዙለ ዲብ ልትበገሰ ዲብ ሰሕል ለትሰርበበው እሉ ምሕርቦት ሕርየት ከፎ እት በርከ ወጋሽ ለሐዝዩም? ሰሕል ወበርከ ክሉመ እግሉ ምድር ሐዲሰ ቱ። ሰሕል ኢሊአምር ወበርከ። ለለአምርም ለዲብ ባካት ዙለ ባኩ ለዐለው ምሕርቦት ሕርየት ሌጣቶም፡ ወህቶም ህዩ

ዔርባይቹ

0ብደለ መሐመድዐሊ (መዐልም)

እ’ለ ኬደው ኢትበሀለው። ሼክ ዐሊ ዲብ ገሉጅመ ከበርለ ብጉሰ እሉም ለዐለ ምሕርቦት ሕርየት እግል ልድሌ ለኢባሰረዩ በሰር ይዐለ። ላኪን ለአዳም ሰበት ኢሊአምሩ ምስጢሩ እት ከብዱ እንዴ ዐቅረዩቱ፡ ዶልክ ባክ ጅማዐት ሐቱ ልትገሴ ወለሃጁኮም ለአተንሴ ለዐለ። የምክን ምነ ሃጁክ ለብዙሕ ከቤራይ እረክብ ለትብል ሰእየት ሰበት ዐለት እሉ፡ እብል ሓለቱ ህዩ ዲብ ገሉጅመ እንዴ ኢልትዐወት አዶም ወደ። ለቱለል ክእነ ዲብ እንቱ ወህቱ ዲብ ለአተናሴ ለከበር እት እዘኑ ሐዘዩ። ለከበርም ባዲ ዐለ ምሕርቦት ሕርየት ወእብ ፍንቱይ ቅዋት አሸዕብዩ ዲብ ጋሽ ወሴቲት ላተ ረአሶም ኢኮን ከበርምመ አፊመ ወትሰተረ።

አምዕል ሐቱ ዲብ ገሀወት ሐቱ ግሱይ እት እንቱ ህዩ ገሌ ጅማዐቲት ዲብ ልትሃጀኮ ቴለል ሰውረት ወአቶብዩ እንዴ ረፍዐው ዶል ልትከሐዶ ወዶልመ ተሕለላት ሀይዶ ዐለው። እት ምግብ ላኪን “ምዳደት በዴት ቤለው ወተረርፈ

ሌጠ በላለሰት። “ምዳደት በዴት” ለልብል ትሉሉይ ልብ ለነኪእ ቤለ ቤለው ህዩ ሰኮብ ከልአዩ። ምናተ እት ልቡ ለገብአት ትግበእ አኪደት እግል ልርከዶ ልሰዕ እምበል ሕላሌ እግል ልሰአሎ ወለአተንትኖ ምንመ ነወው፡ ለበለድ ለሀይ አፍረሀዩም። ለጽልመት ወለ ጭምብወ ምስለ ድማን ወድገለብ ክምሰል ሸማል ልትፈረቅ ለዐለ ቤለቤለው እግል ሼክ ዐሊ ዳየገዩ ወንዩቱ ሓጪረ። ለእት ደሚሩ ድጉል ለዐለ ሰእዮብ እብ ሸፋግ እግል ልትሐቀቅ ምኑ ሰበት ኢቀድር ሰብር እግል ሊዴ ትቀሰቤ። ለግሬሻቱ ሰበት ትወሐዩ ህዩ ለናይ ዔርባይት ሓዚሁ እግል ለአተላሌ አሰልፍ ለነብር እበ ክሳር እግል ልርከብ ቡ። እብሊቱ ህዩ ምሰል አሮ ሱዳኒ ታጅር ክምሰል ሸቃላይ እግል ልሸቄ ትሰአለዩ። ላኪን ክልኤ ክልኤ ሐሰቤ። ህቱ ህዩ፡ ለእምቡቱ ዐለ ሄራር አተላላይ ለሐይሰ፡ ወለ እንዴ ሸቄክ ሴፋክ ወነወልከ እግል ትድመን ብዘ ቤለ። ለሱዳኒ ክምሰል ትሰአለ ህዩ ሰኒ አው ኢፋል እንዴ ኢልብሉ ጽነሕ ሌጠ ቤለ ከእግል ልግሚ ታከዩ።

ሼክ ዐሊ ዲብ ገሉጅ እት እንቱ፡ ዲበ ዑሩፍ እተ ለዐለ ቤት እንዴ አቅበለ እብ ሰምጡ ገብአ። ሰኮብ ላኪን ክሉ ርአሱ ጤረ ምኑ። ምን ሀማት ዲብ ሀማት ወምን ሸቀሌብ ዲብ ሸቀሌብ ትካረ። ቀመትመ ምን አንፈረ ለበዲር ዲብ ዙለ ለአምሮም ወአዜ ዲብ ሓዚህም ብጉሰ ለህለ ምሕርቦት ሕርየት እት ቀደሙ ልትካዩሉ እሉ። ገሉጅ ህዩ እምበለ ልታወጭ ለዐለ አብዶት እብ ጽልመት ግልብብት ዐለት። ክርን ጽልመት ገደሲት ተ። ሼክ ዐሊ ገምጉም ለልብል አክራን አዳም ሰበት ሰምዐ፡ አዜመ ምነ ለሐምስ እተ ለዐለ በሐር ሀማት ወሸቀላት ሐሰሰ። ለእሉ ፈቱ ከበር ለሰምዐ ሰበት መሰለ እቱ ህዩ ዝያደት እግል ለአተናሴ አምበተ። ለልትሃጀኮ ዐለው አንፋር ናቅሾ ወልትከሐዶ ዐለው። ለንቃሽ ወመክሐዶ ህዩ ዲበ ምክራሩ እንዴ ገብአ ለአተንሰዩ ዐለ። አሮ ምነ መትክሕደት፡ “ሸዕብየት ኢበዴት፡ እብ እንክር ሱዳን ዐይተርበ እተ ትትበሀል አካን ህሌት ቤለው፡ እግል ትብዴመ ኢትቀድር” ክምሰል ቤለ ሼክ ዐሊ እንዴ ኢልትአመሩ ምነ ምክራሩ ፍርግጽ ወደ ወለልቡ ሸፈ ከበር ዝያደት ኤማኑ ወሰከ እሉ ወሰእየት ሀበዩ። እግል ለአተንሴ ህዩ እዘኑ ቃፈረ።

ሼክ ዐሊ እባሁ እሊ ከበር እሊ ለአምኦት ኪሎሚተራት ራይም ምኑ ለዐለ ድጌ ዙለ እግል ልሰምዐ ተምነ። ለበዲር ለአምሮም ዐለ ምሕርቦት ሕርየት ዲብ አሮ ውቁል ለኢልትአመር ደብር አው አዳም ወንዋይ ለኢኑብሩ ሕለል እግል ሕርየት ለለአንጎጉ ሸባን ሕርየት እንዴ ትጀመዐው ዲብ

ልሄሮ ወእት ገናድሎ ትካየለው እሉ። እብ በይኑ እብ ፈርሐት ሰሕቅ ቤለ። እባሁ ህዩ ዲበ አካኑ ፋርሕ ዲብ እንቱ ትገሰ ወአሰክ ሀደፍክ ትወክል እበ ልብል ሸዑር ህዩ ከርተፍ ቤለ ወሐር ዲበ ምግሳዩ ምን ሐዲሰ ትርግዝ ወደ። “ማልዩ ወዳርዩ ተዋብዩ ወዐጄ ለጀላብ ወጠን ምን ዐድ ከደን ለሐረው ፍራሰ ምሕርቦት ተሐረር ቶም።” እንዴ ቤለ ህዩ ሐሰበ ወአሰተንተነ።

ፈጅራተ ምድር ክምሰል ጸብሐ ዲበ ሱዳኒ ሐረሰታይ እንዴ አቅበለ፡ “አናዲ እግል እሸቄ ወፈቱኮ ላኪን ምሰል አሮ ዲብ ገዳረፍ ለሀለ ነፈር ሰላዲ ሰበት ብዩ አሰልፍ አሰኩ ምን እገይሰ ሐይሰኒ” ቤለዩ። ላመ ሱዳኒ ረበ ልባርኩ ሰበት አምነዩ፡ “ከላሰ ኮይሰ” እንዴ ቤለ ገበይ ሐበረዩ። ወእግለ ዐለ ምሰሉ ብር ዲብ ጅኔ እንዴ ቀየረ ገበዩ አተላለ። ዲበ ሸነኒክ ለልውሕል ፋይሕ ጋድም እገሩ ዲበ ጸለም መርግ ከላት ዲብ ልትወሐል ምኑ ህዩ ተከሸ እግል ሊበል አንበተ። ሼክ ዐሊ ወድ 50 ሰነት አብ ቱ። አምዕል እብ ግዲደ ልሄርር ውዕል እንዴ ዐለ፡ ባካት ማሲ ምድር በሐር ሴቲት እንዴ ተዐደ ሐመረ ሐልፈ ከዲብ አሮ ድጌ ሱዳን ገንገአ።

ለእብ ሐፋትት ልሁፍ ለዐለ አርሓት እገሩ ዲብ ማይ አተዩ ሸውዩ እግል ለአተንፍሱ። ቡን ዋልፍ ሰበት ዐለ ወለፋ እግል ለአፍግር ወለ ካሰል ዐለ ደሚሩ እግል ልረይሕ ዱሉይ ዲብ እንቱ ወእት ሸፍግ፡ አመተ ኢተአመረት ዲበ ድጌ ለዐለው ዐሳክር ሱዳን አዳም ገፎ ሰበት ዐለው ሼክ ዐሊመ አረይ እግል ኢልግበእ ትሻቀለ ወእት ሐዲሰ ሀማት ትካረ። ለቱለል ህዩ እግል ልእመኑ ኢቀድረ።

እተ መደት ለሀ ለዐሳክር ሱዳን እግል እምበል ገበይ ቃኑን እግል ልሸቀው እት ምድር ሱዳን ለአተው አንፋር ልትነዐው ዐለው። ለልትነዐው ዐለው ህዩ አርወሐቶም እግል ለአንግፎ ለሀርቦ ወለዐሳክር ደርቦም ልትሳሰወው ክምሰል ረአዮም ሰኒ ወአማን ትነክደ፡ “አላህ! እሉም ልትነዐምም ለህለው ክእነ ክምሰልዬ ኤረትርዩን ገብአ። ሕናመ ዐድነ ሕርርት ምን ትገብእ። ምን ክእኒታት ወትነጃነ። ላኪን ደሐንቱ፡ አምዕል ህሌት እሉም እት ከደን ሸፋላም ለህለው ምሕርቦት ተሕረር ልትሰርገሎ ወኤረትርየ ትትሐረር” ቤለ እብ ደሚሩ ዲብ ለአሰተንትን። እተ አካኑ ህዩ ክምሰለ ለሀርቦ ለዐለው አንፋር እግርዩ አፍግሪኒ እንዴ ቤለ እት እግሩ ይሐዘ። እግል ልህረብመ ኢወጠነ። መረ ድዩር ወታልፍ ሰበት ዐለ ህዩ፡ እተ አካኑ እግል ረበ ወደዩ አሰበረ። “እለ ወደው ሊደው” እንዴ ቤለ ህዩ ታከዮም። ለዐሳክርመ ኢትአክረው፡ እግል ሼክ ዐሊ ኩብ እብ ጽብጠት አበለው።

ሰላም ለደሬሳ ፍሬ ሰላም!

የም 06/01/2019 ሳዕት 6:00 ጽብሕ ምድር ምን ምግባይ መርከዝክ ፎርቶ አስመረ አስክ አቅሊም ጋሽ በርከ ንትባሽ እት ህሌኑ ምስል ፈርሐት ወሰኔየት ዐባይቱ። ለሰፈር ህዩ እግል ሐድ 500 ኪሎሜተር ሪም ሰበት ዐሌ። እግል ዕርፍ በክት ለልሀይብ ይወላ። ለአርበኛ መኪነት ወዛረት እዕላም ዲብ ልትገናበየ እት ከረን ክምሰል ተሐየበየ ሕድ ዲብ ታብዓተን ሳዕት 12:00 አድህር ተሰነይ ለበጽሐኑ።

ሀደፍ ናይለ ሰፈር እግል ከሲት ከጥ ኡምሐጀር-ሐመረ ኣምም ሰበት ዐሌ። ምስለ ዐለ መትረማጭ ክልኢቱ ግዋሬ ገባይል ወምሰለ እብ ትሉሉይ እግል ልትከሰት ቱ ዲብ ልተሰህል ለዐለ ሰኢየብ እት ፍዕል ለልውዕል እተ ዕለት ምስል በዐል ልደት ሰበት ናሰበት ህዩ። ለአምዕል ደብል ዒድ ጸብጠት ዐለት።

ሳዕት 2:00 ሐቆ አድህር ዲብ ተሰነይ ክምሰል ትጸበሐክ ምን ሐዲሰ እግል ክሉሰ ለይዐለ ሰፈርን ለታርፍ ምኒን ለዐለ 100 ኪሎሜተር እንዲ ነተርን ኡምሐጀር አቴኑ። ዲብ ምዴርየት ገሉጅ ክምሰል በጽሐናቱ ህዩ ለሰኢየት ለሀይብ አዋይን ለትከብቱኑ። ዲብ ሸዋርዕ መዲነት ገሉጅ ልሰቀል ለዐለ መንዴራት ኤረትርየ ወአቶብየ እግል ናሱ እግል በርናምጅ ለሸፊሕ ዐለ። ገሉጅ፡ ገርገፍ፡ መዕሉብ ዲብ እምብል ህዩ ዲብለ እት መደት ሐርብ ለትሸቀ ከዛን ባደሚት ምስለ እት ድዋራቱ ለአደርሰ ወሽፋል ለዐለ አንውየት እብ ፍንቱይ ሐብጋይት ወአጣል ዲብ ንትፈረጅ፡ ለሄራር ሰኒ ወአማን ዐጅቤ። ዝያደት ክሉ ህዩ እበ ዲብለ ድዋራት ለመጽእ ተቆዩር ርይሓም ዲብ ሕናቱ እንዲ ኢልትአመረን ዲብለ እም ሐርሰ ወርዕዮ ላተ ኡምሐጀር ጠበሽ ለእምቤ።

ኡምሐጀር ክምሰል በጽሐና መ እግል ዕርፍ አስክ አካን ለትንደት ይአትቃመት። ለፈጅራተ ልታኬነ ለዐለ ዳይ ዐቢ ለከሰሰ መስሉልየት ሰበት ራፍዓም ዐልኑ። እብ ፍንቱይ አንፋር ሀንደሰት ወቲክኒክ ተለፍዝዮን ዲብለ ዓደትለ መናሰበት ለትገብእ እተ ምን ኡምሐጀር እት መሳፈት 8 ኪሎሜተር ባካት ክብራሰቲት ለህሉት አካነት እንዲ ጌሰው ዲብ ተኪል ስቲድዮ ወጀርቤ አተው። ለሸቅል ህዩ ምስል ወክድ መትባዳር ዐለ። ሰበቡ ዲብ እለ ምሴት እለ ክሉ ሸእ እንዲ ጀረብከ ወአዳሌክ እግል ትትመዩ ሰበት ብከ ለሸቅል ድቁብ ወምሰል ወቅት መትሳሰዓይ ቱ ለዐለ።



አንፋር ጀሪደት ላኪን ለዲብ ከርሰ መዲነት ኡምሐጀር ለህለ ቴለል ለከሰሰ በራምጅ እግል ንሸቄ ሰበት ዐለ እግልኑ ለሓለት እግል ወሰቆት ምስል መመቅረሐት ልግበኦ ወሸዑብ ዲብ ንትዋጀህ እግል ናይ ሰኢየት ቴለል እግል ንሰንድ ሐሬኑ። ሕናመ ክምሰለ ዲብ ጠረፍ ሕለል ሰቲት ሰትድዮ ተክሎ ለዐለው መልሂትን ዲብ ቀበት ኡምሐጀር ዲብ ንዳወር እግል ጀሪደት ለገብእ እግልን በራምጅ ዲብ አዳላይ አቴኑ። እተ ምሴት ለህ ኡምሐጀር ለትትሐደረ ዐለት ሄሰት ዐባይ ዲብ መዳሊት እንዲ ትጸመደት ሰነነ እብ ፋሬሕ ገጽ ዲብ ኩብቱ ጋሽ ወተኪል መንዴራት ወሰቅራታት ለአመሱ እት ህለው፡ እግል ፈጅራተ ለዐለት ዓደት እግል አገረሞት ዐለ። ሐቆ ሳዕት 8:00 አምሱይ ህዩ። ሸዐብ ኡምሐጀር እብ ፍርቀት ዓዳት ሰቲት ወእመራም ሐልየት ጀብሀት መንጠቀት ምውዳቅ ጸሓይ ዲብ ልትፋገዕ ትመዩ።

ፈጅራተ የም 7 የናይር 2019 ለመናሰበት ጽቤሕ ምድርተ ለተአምበተት። መዲነት እምሐጀር ህዩ እብ ሰፋፍ መኪይን ወደረሰ ምን ጅወ ለመጽእ ጋሽ ትረገሐት። መመቅረሐት በራምጅ እብ መክረፎናት እንዲ ወደው ሸዐብ ዲብ ለአትመቃረሐ፡ መኪይን መንዴራት ኤረትርየ ወአቶብየ ዲብ ረፍርፍ ክታር ረዩም እንዲ ወደ አስክለ አካነትለ መናሰበት አተጀሀ። አንፋር



ውዛረት እዕላም ህዩ ዲብ ባካት ቢንቶ ለዐለው ወክርሰ መዲነት ለዐልነ እብ ጀሀት-ጀሀትን ለበርናምጅ እግል አግመሎት ወግራሁ ለገይሰ በራምጅ እግል አከቦት ዲብ ትሩድ ሸቅል አጽበሐኑ።

እተ ወክድ ለሀይ ለምን መዲነት ተሰነይ ለትባሽ አካናት ዐማር ዲብ ልርኤ እብ መኪይን ወሄሊትፕተራት መጽእ ለዐለ ሕሹም ጋሽ በህለት ርኢሰ ደውለት ኤረትርየ አሰይድ ኢሰያሰ አፍወርቂ ወርኢሰ ውዘረእ ፈደራልያይት ዲሞቅራጥያይት



ጀምሁርየት አቶብዩ ዶክቶር አቢ አሕመድ ውበዕዳም ሰብ ሰልጠት እግል መትከባት ምነ ሐሰብናሁ ወቅት ወለዐል ታኬ።

ገቢል እምሐጀር እብ መኪይን ወእብ እገር ዲብ ልትገዐዝ ዲብ አዋራፍ መሓዝ ሰቲት እብ ጀሀት ኤረትርየ፡ ሸዐብ ሐመረ ህዩ እበ ካልኣይ ደራግ ሕለል-ሰቲት እንዲ ገብእ እግል ታሪካይት መናሰበት እብ መትረማጽ ዐቢ ልታከየ እት ህሌ፡ መንዴራት ክልኢተን ድወልመ እተ ክልኦት ጠረፍ እንዲ ትሰርሰረ እበ ሃድእ ሸማል ረፍርፍ ዐለ።

እለ ህዩ ለዘበን ክምሰል ትበደሉ፡ ባብ ሐርብ እንዲ ትደበኦ መንገኦት ሰላም ክምሰል ትከሰተት ለበሸርቱ ዐለ። አክል-ሕድ ሳዕት 11:30 ቀደም አድህር ለዲብ መሰኢት ሌጠ ሕዱድ

ትበሸረየ።

እብ ዝክር ሹሀይ ወወጠንያይ አናሺድ ክልኢተን ድወል ለአምበተት ዓደት፡ ከሊመት አቅሊም ጋሽ በርከ እብ ሙዲር ዓምር ፍራንኮ ኩባበ ክምሰል ትቀደመት እግል መደት ሐቱ ሳዕት ለአተላለ ዕፌ ዓዳት ገብኦ። ግረ እለ ለዓደት እብ ዐውቱ ክምሰል ተመት፡ ለሕሹም ጋሽ ምነ ዳሰ ዐቢ አስክ ኡምሐጀር ገጽ ትበገሰ። ግረ ደቃይቅ ህዩ እበ መጽእ እበን ሄሊትፕተራት እት አጅወእ ኡምሐጀር ሐመረ ሐቆለ የለ ህዩ ትሳረሐ።

ግረ እለ ለላሊ እብ ግዲደ ክርዕ ለትመየ ገባይል ክልኢቱ ግዋሬ መዳይን፡ ክምሰል ዎሮ ፍራዩ ለትፈተሐ ሐርብ ዲብ ሕድ ትከብሰሰ። ኮድ ሐቱ ለታርገተን መኪይን

መርሐለት ዐዲት። ሸባብ ክልኢቱ ዐዶታት ሕኔት መትሻፊት ሕድ መጋንሐት ሕድ እንዲ ገብአው ኣምዕል እብ ግዲደ ሕድ ዲብ በጽሕ ወሕድ ዲብ ልትካበር ወልትሰዓዐም ወዐለ። ክሉ ፈርሐ ወቀርደ። ለትዛቤ ወልኣዘቤ ታጅር ወለለሐርሰ ሐረሰታይ፡ ምስተሰምር ልግበእ ወበጽሓይ ሰኢየት ሰኔት እንዲ ትሰፈ ግረ እለ ገድም አስክለ መደምራይ ሐርብ እንዲ ኢገብእ፡ አስክ ብነ ወዐማር እግል ለአትቃምት ህዩ ላብድ ቱ።

ሕናመ አንፋር እዕላም ግረ ቲማሞለ መናሰበት ክምሰል ኣዳምነ አስክለ ቅብላትን ለዐለት ሕመረ እግል ንትዐዲ ወለዲብ ከርሰ ሕመረ ለህለ አዋይን ምን ቅሩብ እግል ንድሌ እብ እግር አስክለ መዲነት ንትዐዲ እት ህሌኑ ለእግል ሰኒን ብከሕ እግር ኣዳም ወመኪይን ካይዱ ኢለአምር እምሐጀር ወሕመረ ለለአትራክብ ኩብሪ እብ ኣዳም ወመኪይን ምክራይ እግር አስክ ለሐግል ትረገሐ። ቢብ ቢብ ለልኣብል መኪይን ለልትሰዓዐም ኣዳም ለልትረኤ እተ አካን ሐውልየት ህዩ መሰለ። ምስለ እብ ሐንቴሁ ሰነት እብ ግዲደ ለጀርወን ሶታይ ማይ ህዩ፡ ለባካት ዲብ አካነት ፈርሐት ወለውቀት ትበደሉ። ለዲብ ሐንቴነ ዲብለ መሓዝ ለሐምሶ ወልተልሀው ለዐለው ሸባብ እት ነዐፌ ህዩ ፈርሐትን ዝያደት ፈርሐት ወሰክት ዲብ እንተ አስክለ መዲነት ተዐዲ።

ምን ክሉ ለዐጅቤኒ ላኪን፡ ለዐስከርያይ ዘይ ለለብሰው ወእግል ሰኒን ረዩም ሕድ ለአትውሕሎ ለዐለው ዐሳክር ክልኢተን ድወል እንዲ ኢተርፎ፡ ዲብ ሕድ ዝያረት ዲብ ሰጅሎ፡ ዲብ ልትሰዓዐም ክምሰል ረኤኩምም ፍሬ ሰላም ምን ቅያሰ ወለዐል ዋዑም ክምሰልቱ እብ ፍዕል ረኤኩ። ዲብለ ናይ ሐቱ ኣምዕል በክትን ምነ ትፈረጅናሁ ህዩ መጣዕም፡ ገሃዊ ወግራት ኡምሐጀር እብ አቶብዩን ርጎሕ ዲብ እንቴ ክምሰልሁመ ሸዋርዕ ሐመረ እብ ኤረትርየብ ቤጽሐት ዕሙር ዶል ትርእዩ፡ ለሕልም ኣማን ክምሰል ትበደለ ሸክ ኢትወዳ። ለፍንቲት ዕላቀት ምን በዲር ለበን ክልኤ መካቲት መዳይን ህዩ ገደን ውብሶተን ክምሰል በዲረን ገቢለን ሕድ እግል ልብጸሕ ወርዝቀን ሕድ እግል ለአትሄድየ ምን ቀድረየ። አይወ ሰላም ለደሬሳ ፍሬ ሰላም ህዩ ክእናቱ።



ጀብሀት ተሕሪር ኤረትርዮ (ጀ.ተ.ኤ.)

ዲብሊ ካትብ ወባሕስ ተእሪክ ላቱ አሰደድ አለምሰገድ ተሰፋይ ምን ፈደሬሽን አሰክ እስትዕማር ወሰውረት (1952-1962) እብ ልብል አርእስ ለከትብዩ ክታብ፤ ጀብሀት ተሕሪር ኤረትርዮ (ጀተኤ) ለታይን ጽባዋ እት ሞራፍ 21 ካትብ ህለ። ከእግል ዮም 1^ኛ ክፈል እግል ንርኤት



ፔክ እብራሂም ሱልጣን

ታሪክ ጀብሀት ተሕሪር ኤረትርዮ (ጀተኤ) ፋዩሕ ወሰተሐባለካ ቲ። ቆሪ በሐስ ክምሰሁ መሃን ለዐቅብ አግቡይ ጽብጠት ህዩ ለትሐዝዩ።

ሐረከት ሚሰጠራይት ዐለት ልትብህል እት ህሉ ምስጢረ ዲብ መትዝመ። ሀውዋት ሚርሐተ ወአንፋራ፤ ክምሰህሁ ዲብ ወዳሐት ናይ በራምጀ ለተሐደዳቱ ለዐለ። ዲቡ ሰባት ተሐጨረት ህዩ ናይ ፍዕል ጽባዋ ወራታተ አው ህዩ ናይ ታሪክ ሚሰጠራት ዐለ እለ ብሂል ለልትቀደር ኢኮን። ብዙሕ ናይ ፍዕል ተጃርብ ሰባት ኢኮንላለት።

ምሰል ሐረከት እንዴ አትመግወርቲ ዲብ ገሌ መጃላት ለትሰረገቲ፤ ጀተኤ ሞላቀ ተንዝምቲ ለዐለ። እብ አዋጅ ግድለ ሰለሕ አምቡተት። እብ አዋጅ ህዩ ቅደደተ አትአመረት። ላኪን ዲብ አግቡይ መትዝመ ልግበኤ ወዲብ ሰተቶት ወተግበርት ስታቲባት ናሽቡት ይዐለት። ዲብ ከብደ ለትፈናተ ወዲብ ሕድ ለኢብይኤ ናይ ሲዩስት ወመሕበራይ ፈልሰፋት ወምዩላት ከምከሞተ ክምሰል ኢፋሉታይ ምንመ ኢልትረኤ። እንዴ አትመቃረሐ ዲብ ሐቲ ዐግሎ እግል ለአምላክ ለቀድር ይዐለ። እብሊ ህዩ፤ ሰብብ መትፈንግረ ላቱ መሸግሸብ ከልቀት። ሲዩሲይ ተዐድድ እንዴ አትመቃረሐ እግል ትዋሌ ለትቀድርመ ቅደደት ይዐለት እለ። እብ መጅብ እለ ምን ሰልፍ እንዴ አምቡተክ አሰክ ለተንዝም ልትፈንግር፤ ውሕደት ወመቅርሕ እግል ልግመም ምኑ ቀድራ።


እለ መታክል እለ፤ እግል ብዝሓም ኤረትርዮን ወብዕዳም ኬትቡት እግል መትአምባትለ ተንዝም ዲብ ካጢ አው ህዩ እት ሕድ ለኢብይኤ ፈላም እት ዋልዮም እንረኤ። ምር ምን እለ፤ ፕሮፌሶር ዐቅባበጊ ዮሃንስ፤ ፋዩሕ ክቱብ እብ ሰባት ታሪክ ኤረትርዮ ለኣዳላ ቲ። ዲብሊ “ኣብራት ውላዮት (አምሪክ) ወቀር አፍሪቀ” ለልብል ክታቡ ላኪን፤ ጀተኤ አተላላይ ናይ ሐረት እስትቅላል ኤረትርዮ (Independence Bloc) እት ገብኤ፤ እብ ወልደአብ

ወልደማያም፤ ኢብራሂም ሰልጣን ወእድሪስ መሐመድ አድም ክምሰል ተአሰሰት ሻርሕ ህለ። ኢብራሂም ሰልጣን ልግበኤ ወወልደአብ ወልደማርያም እግል ጀተኤ ክምሰል አሰሰው፤ አንፋራመ ክምሰል ይዐለው ሐራ ሰባት እንርእዩ፤ ዲብ እለ ብዙሕ ወቅት ኢኮንላለ።

ዲቪድ ፑል ለልትብህል ወድ ብራማዳ ኬትባይ፤ በገሰ ጀተኤ ለዲብ 1940ታት ለቀንጸት መቃወሙት ትግራ ድድ ጸንዲት ወዲን እስላምቲ ልብል። ለናይ እስላም ከዮ ወሰክ በሐስ ክምሰል ለትሐዝዩ ምንመ ለአሙ፤ እግል ጀተኤ በደለ አው አተላላይ ናይ አልራቢጠ አል እስላሚያ ክምሰል ዐለ ለለርኤ ክልኦት ደለል ህለ እዩ ህዩ ልብል።

አወላይ፤ ቤለ ህቲ እድሪስ መሐመድ አድም ወኢብራሂም ሰልጣን ምን ኤረትርዮ እግል ልፍገር ለቀድረው እቡ ምስጢራይ ሰዳይት እስላሚያይ እንክር (አው መሕበር) ኻትሚያ ቲ። ሱዳን ክምሰል አተው እት አካናት ሚርሐት ኻትሚያ ዲብ ሱዳን በህለት ሐሰን አል ሙርቀኒ ወዐሊ አልሙርቀኒ መትከታሉም፤ እግል እስላሚያይ በገሶም ለአሸር ልብል። ካልኣይ፤ ዲብሊ ምሰል ሐረከት ለዐለ በአሰሙ፤ ከረ እድሪስ እግል ሐረከት ክምሰል ኢድንያይ ወሽዲ እንዴ ሰመው፤ እት ቀደም መደንደን ሚርሐት እስላም ናይ ምውዳቅ ጸሓይ ከሊማት እብ ሸክ ክምሰል ልትረኤ ወዲሆመ። እግል እስላማይ በገሶም ለወዴሕ ቲ።

ክእነ ልብል እት ህለ ዲቪድ ፑል



አሰደድ ዕሰማን ሳልሕ ሰቤ

ላኪን ለእስላሚያን ሚርሐት እግል ጀተኤ ለሰላይዶ ዲብ ኤረትርዮ ግዝም እስላሚ እግል ልተክል ቲ ወለ እግል ወጠኒያይ ንዳል እንዴ አድዐፈው ቀበልያይት ሰልጠኛም እግል ለአተርዶ ዋዴሕ ክምሰል ኢኮን ለሐብር። እብ ተውሳክ ዋቅዮት መሻረኩቶም ዲብ አምቡተት ግድለ ሰለሕ ክምሰል ሐወጸ ግራሁ ጀተኤ እብ ዐረብያይት ወጠንዮት መሰር እብ መባድኤ መቃወማት ሽዑብ አልጀዝኦር ተእሲር ሰባት ወደ እቶም፤ ለእስላሚያይ አው

ዲኒያይ አሳሳም ክምሰል መትአምባቱ ክም ይአተላለ ፑል እብ ተውሳክ ለአፍህም።

ዲቪድ ፑል ለትረሰዎ ምር ሸኤ ላኪን፤ ከረ ሙርቀኒ ዲብ መትአምባት ንዳል ሲዩስት ራቢጠት በህለት ሰይድ በክሪ አልሙርቀኒ ርኢሰለ ተንዝም ክምሰል ገብኦ ሌግ ቱ እግል እስትቅላል ኤረትርዮ ለትጸገ። ለናይ ትግራ ወሸማግሌ ንዳል ዲብ ሰነት 1948 ሰኒ ወአማን ክምሰል ሐፍን ላኪን በክሪ አልሙርቀኒ ምሰል ሐምም አሰክ ሕብረት ዲብ ልትሓበር ወሐርመ ክምሰል ተዐሰው ትረኤው። እብሊ አሰባብ እለ ፍንጌ ራቢጠት ወጀተኤ ክም መትራከቢት ልጀሚት እግል ንርአዮም ሰዱድ ቲ። ዲቪድ ፑል ለኢህደንደር ክምሰል መትራከቢት ልጀሚት ዶር ዐቢ ለአግደ ሚርሓይ ደዮነት ሰይድኑ መሐመድ ዳውድ



አሰደድ እድሪስ መሐመድ አደም

ቲ። እብ ሰባቱ ሐራ እግል ነኣኪ ቲ።

ረድኤ በረከትአብ እብ ጀሁቲ፤ እግል አግቡይ ምጽኦት ጀተኤ እብ መሐረሰ ምሰል ሐረከት ለዐለት እለ ፍንቲት ሸርሐዩ። ህቲ መገሰ ጀተኤ ለዲብ ሰነት 1947 አልራቢጠ አል እስላሚያ አሰክ መመርምራይት መፈወደየት አርበዕ ድቁባት ድወል ለአቅሪቡ፤ “እስላም እብ ብዝሐ ልግበኤ ወእብ ምልክቶት ምድር ኤረትርዮ እዴ ዛይደት ቦም...” ለልብል ዐለ ልብል። እብ ፈላም ረድኤ በረከትአብ ሚርሐት ጀተኤ ዲብ እለ ክላሰት እለ ለበጽሐው እብሊ ለተሌ ሰለሰ አሰባብ ቲ። ሳልፋይ፤ እስላም ዲብ 4 ሕምሲት ምድር ኤረትርዮ ሰባት ነብር፤ ካልኣይ ዲብ ሴዕ ቆሚያት (አው “ ናይ ህግ ወቀባይል ሐሸምት) ለሰማን ዲብ እስላም ሰባት ለአም፤ ሳልፋይ ወፍንቲይ ላቱ ህዩ፤ ለበዝሐው ክሰታን ሕብረት ምሰል አቶብዩ ሰባት ለኣይዶ፤ እብ ዕን ሸክ እግል ልትረኤው ሰባት ወጀብ... እብ ህግ ብዕደት፤ በገሰ ጀተኤ እስላማይ ዐለ በህለት ቲ።

ዶክተር ጋይም ክብረኣብ እግል ጀተኤ እብ ዐውል ሐረከት፤ ምኑ እንዴ ሐልፋመ እግል ሐረከት ክምሰል “ሹዲ፤ በዐል ሰላም ወእግል ኤረትርዮ ዓዳት ወመንበረት ለትሸቄ...” ቅደደት በ እንዴ ቤለ ክምሰል አትዓብዩ ሸፊሕ። እግል ሐረከት ዲብ አሲር አንፋረ ወመትፈንግረ ለለአበጼሕ ዋልም ወዴት እንዴ ቤላም እግል ጀተኤ ለትዐግብ፤ ምሰል ሐረከት ልትረኤ እት ህለ እብ እስላም ዝያደት ተአሲር ለገኦ እቶም አንፋረ ዲብ ብዱር ምውዳቅ ጸሓይ ቀላቅሎታት

ለተሐደደ፤ ሰኒ ሕዳም ደረሰ ሌጠ ለዐለው እት፤ እብ ሰብብ እለ ህዩ “እግል እስትራተጂያይ መትመዳድ ሐረከት ልግበኤ ወእግል ቅራመት ለሰንድ ዲሞቅራሚያይ ደሚረ” እግል ተአምም ለኢልትቀደር ክምሰል ዐለ ጋይም ሻሬሕ ህለ።

ዶክተርት ናት ኢዮብ ዲብ ክታብ፤ እግል ዲን ክምሰል ም ተእሲር ዲብ ከርስ መትጸገዕ ጀተኤ ዲብ ድወል ዐረብ በቲ ክምሰል አግደ በገሰለ ተንዝም ኢተህደገ እብ። ህቲ ሸክል ተንዝም ሐረከት ክምሰል ናይ ተሕሪር ሐረከት ላቲን አምሪክ ዲብ መዲነት ለተንዝብ ገብኦ እት ህሉ ናይ ጀተኤ ላኪን ዲብሊ ናይ አበዊ (ናይ አብ) አግቡይ ሚርሐት ናይለ ዲብ ካርጅ ለነብር ሚርሐት (patronage of the leader-in-exile) ለመሰል ናይ ምውዳቅ ጸሓይ ቀላቅሎታት ክምሰል ዐለ ተሐብር። እለ አሳሰ እለ እግል ለአተርዶ ለለሐቲ ህዩ፤ ተአተላሌ ናት ኢዮብ አሳሰለ ጀተኤ ምን ሰልፍ ናይ እንፍላል አው ናይ ከሬም ሲዩስት (the politics of exclusion) ቱ ለሐረመ። እለ አግቡይ እለ ገበይ መትፈራታክ እንዴ ከሰተ ቢሉ ቢሉ እግል ተንዝም ለልትሐውን ባብ ሰባት ከሰቲ፤ ኢፋሉታይ በገሰ ክምሰል ዐለ እለ ወደሐት።

አልአሚን መሐመድሰዲድመ፤ ጀተኤ ግድለ ሰለሕ እብ አምቡተት እግል ትክለቀ ፋዩሕ ናይ ድድ እስትዕማር ንዳል ፈላም ዲብ ለአዘይድ፤ ለተንዝም ላኪን እብ ፍንጠር ወእብ ሰባት ተክዊን ሸዑብ ኤረትርዮ ፈላም ለኢዐለ እሎም አው ምን ሐልፈ ናይ መትዳፋል ተጃርብ ናይ ሸዑብ ተዕሊም እግል ልክሰሶ እብ ኢቀድረው አንፋር ክምሰል ተአንበተ ሸርሐ። ክእነ ሰባት ገብኤ፤ ለሐራ ዲብ ሰውረት ኤረትርዮ ለትረኤ ናይ ዲን፤ ምዴርየት ወቀቢለት ለአሳሱ እብ እስትዕማር እንግሊዝ ወአቶብዩ እብ ማኒ ለቀንጸ መትፈራታክ እግል ልክራ ላብድ ገብኤ።

መብዝሐ እለ ለተህደገ ታሪክ እግል ጀተኤ ምን ተብጊሰተ ሕብር እኩይ ሰባት ሐብረዩ፤ እግል ሐለት ወወቀይ ናይለ ተንዝም እንዴ አዘ፤ ለዓሳ ሌጠ እግል ልወዴሕ ለሰትት አግቡይ ሌግ ቱ ለልብሎ መትቃርመትመ ኢተሐገለው። እብ ፍንቲይ ምሰል ጀተኤ ዕላቀት ቦም እግል ልትብህሉ መትመራምረት ታሪክ፤ ምን እለ ቅራመት እለ ለልትብገሰ ሰኣል ቀርብ እቶም ዐለ። ለሰኣል “ታሪክ እብ ዕውታምቲ ለልትከብብ



አሰደድ ወልደአብ ወልደማርያም

ልትብህል። ምሰል ተንዝም ጀተኤ ዕላቀት ለም ኬትቡት፤ ሚዛን ለቡ ምን ሐቃይቅ ለልትብገሰ ታሪክ ጀተኤ እግል ልክተቦ ቀድሮ ገብኤ?” ለልብል ቲ። እብ ህግ ብዕደት፤ ጀብሀት ሸዑብ፤ ክምሰል መትቃወማይት ጀሁት እብ ሰባት ጀተኤ ለለሰኣሉ ታሪክ እብ ብዕዳም ከብቲ ዲብ ረክብ ሰባት ልተዳጋገም፤ እት ረኣሰ ጀተኤ ታሪክ ዐገብ ጀሬ ህለ... ለትብል ተ ለመከላከል።

ታሪክ ሰውረት ኤረትርዮ ላኪን፤ ክእለል ተጃርብ ሐረከት፤ ጀተኤ ወጀተኤ ሰባት ገብኤ፤ እንዴ ትፈናተ ወእንዴ ትባተክ እግል ልትረኤ ኢወጅብ፤ ክምሰል ሐቲ ክምክምት ወምህም ክትፈት ወጠኒያይ ታሪክ እንዴ ትሰላ፤ ሰልሲቲ ተናዝም፤ ሐረከት፤ ጀተኤ ወጀተኤ ምር ክክም ወቀዩ፤ እብ ሐዋን ወብቀዕ ፍዕሉ ልትሸረሕ እት ህለ ሌግቲ፤ እግል አማም ለከድም ተጃርብ ወሚራብ ለለአወርሱ።

እብ ጀሁት ብዕደት፤ ጀተኤ አው ናያ ናይ ታሪክ ከዮ ለልተባዎ አው ህቲ ለአሰረ እቶም ኬትቡት ወመትመራምረት ሌጠ ኢኮን እለ ለትብህለ አው እሉ ለመሰል ተሕለላት ለለአቀርቡ፤ ብዕዳም ምን ቀድየት ሸክ እንዴ ቤለው እግል ልመርምር ለጀርባ አው ህዩ እግል ምን ሄራር ታሪክ ወንዳል ተሕሪር ኤረትርዮ ለልትቃወም ኬትቡትመ ምን ምን ክሉሊት ተሕለል ወፍርድ ኢፈገር።

ምን እሎም ሓርያም፤ ጀን ማርካኪስ ወገን አዩሌ ሌግቶም እግል መአምቡት ጀተኤ እብ ፍንቲት ገበይ እግል ልርአው ለጀረቡ፤ እለ ለተሌ ህዩ ቤለው።

ልተሌ...




በደ ሐድ ወአሰባቡ

በደ ሐድ (ዓደት) እት ክልኤ እንክፍሉ። ንኢሸቶ ናይ እማተ ዲብለ ኢልትረአየ ዲበ ደረጃት እንዴ ዐለት ዕምረ ክም ተመ ኢትረአየ ምንገብእ አወላይ ጅንሰ በደ ዓደት ልትበህል። ምን ወለት 16 ሐቕ ሐልፊት አውመ ምን አክቡብ ለአፍገረት እቱ ዕምር ሐቕ አርበዕ ሰነት ልትሐሰብ።

ለወለት ዓደተ እንዴ ትመጽእ ዐለት እት ምግብ ምን ልውሕድ ሰለሰ ደውረት ሓለፊት ምንገብእ

Septum) በደ ሐድ እግል ትሰብብ ትቀድር። እግልሚ፡ ቅን ምን ክልኤት እንክር በህለት ለዓል ወተሓት ትትከለቅ። ጅንት እት ከብድ እመ ዲብ ሀሌት ለዓሉ ወተሓቱ እንዴ ዐበ እት ሕድ ልትሓበር። ለዐልቀት እብ ገሌ ምስምስ ክልቀት ለክልኤት እንክር ቅን እንዴ ኢልትሓበር ትወለደት ምን ገብእ ፍንጌ ክልኤቶም እርደት ተህሌ። ለወለት ሐድ እት መጸአ ከደን ሰበት ኢፈግር እንዴ



አውመ ሰበ ወሬሕ ሐቕ ትከልእ ምን፡ እሊ ለካልእ ጅንሰ በደ ሐድ ቱ።

አወላይ ጅንሰ በደ ዓደት እግል ለአምጸአ ለቀድረ ሰለሰ ሓጀት ተን።

1. እት ሕሊል ቅን ለሰህሌ መሻክል
2. መሻክል መሕፋደት ቤጭ
3. እት ምግባይት መራቀብት ምክ (ሐንገል) ለተህሌ መንካሰ

መሻክል ሕሊል ቅን፡ በረይ አፍ ቅን

እት ወለት አዋልዶ እግል አፍ-ቅን ለደብእ በረይ አፍ-ቅን እብ ተማሙ ዶል ለትሙ(Imperforate Hymen) ሐድ ገበይ እበ ፈግር እንዴ ኢረክበ እት ሕሊል ቅን ልትከለቅ። ሰልፍ ለወለት ሐደ ክም ባዲ መስል እቱ፡ ሐቕ መደት ላኪን ዲብለ ሕሊል ክም ተክከበ መጸአት ወዴ ዲቤ፡ ዲብ ገሌ አንሳት ሀዩ ለበረይ ምን ጎፍ ዐድ ሰበት ልትሰደድ ምን ጎፍ ከደን ልትነፈሕ። ለወለት እሊ ምሽክለት ሀሌት እት ምን ገብእ፡ እት ክል ደውረት ለሐድ ከደንመ ምን ኢፈግር እግል መጸአት ለአፈድብ እቱ። ከናይ እማተን ለኢትረአየን ወእለ ትመስል መጸአት ለብእትን አዋልድ ዲብ ሐኪም እግል ሊጊሰ ሀሌት እለን። ለሐል ሀዩ ቀሊልቱ፡ ለበረይ እብ ዐመልየት እንዴ ትፈተሐ ለዓደተ ገበይ ክም ትረክብ ትገብእ።

እርደት እት ቅን

ቅን እት እንክር ለዓል ወተሓት ለትከፍል እርደት ምን ተህሌ(Transverse Vaginal

ተክከበ መጸአት ወዴ እቱ። እሊመ እብ ዐመልየት እግል ልሰኔ ለቀድር መሻክልቱ።

ቅን አንሳይት በታተን ምን ኢልትከለቅ(Vaginal Agenesis)

ክእነ መስል መሻክል ለበን አንሳት ሰኔ ሕዳት ምንማተ አመሮቱ ሰኔቱ። ቅን እት እንክር ለዐሉ አው ተሐቱ መሻክል ዐቦት ምን ለሀሌ ቅን አንሳይት እግል ትከለቅ ኢትቀድር። እሊ ሓለት እሊ አንሳት እቱ አወላይት ምዕል ጅመዕ ልሽዕረ እበ አውመ ዓደት እንዴ ትከረዐት እቱን እብ መጸአት እት ሕክም ክም መጽአየ ለአምራሁ።

ኢመትከላቅ ቅን እት ክልኤ ልትከፈል።

1. ርሕም ለብእትን ወቅን ለኢትከለቅት እቱን፡ እለን አንሳት እለን ምን ገርብ ገፍበት እንዴ ትነሰክት ቅን እብ ዐመልየት እግል ትሸቄ እቱን ትቀድር።
2. ርሕም ወቅን ለኢለበን (ለኢትከለቅ እቱን) አንሳት እግል ልውለደ ምንመ ኢቀድረ እግል ጅመዕ ሌጠ እብ ዐመልየት ቅን እግል ትሸቄ እለን ትቀድር።

መሻክል መሕፈደት ቤጭ

መሕፈደት ቤጭ ፈሽል ህለ እት ምንገብእ እግል ዐቦት ቤጭ፡ መንደቅ ርሕም ወለመስሉ ገርብ ሰርዐት መትፋራይ ለራቅቦ ሆርሞናት እብ እኪት ሰበት ለአሰር እቱ እት በደ ዓደት ግዴቱ ዐባይተ። መሕፈደት ቤጭ እብ ለትፈናተ አሰባብ ፈሽል እግል ልምጸአ ቀድር።

ገሌ ምኑ፡

- ሰበቡ እበ ኢትደለ ቀደም ደለ ተክንተሄ
- መእረር መሕፋደት ቤጭ

እብ ሕውነ ሐለት መዳፈዐት ገርብ ለመጽእ ሕማማት


- እግል ብዕድ ሕማም እብ ጮሬሕ ሱሪት ምን ትገብእ
- እት ሰንዐት ሆርሞናት ለለአወቁ ኤንዛይማት ገሌ ክለል ምን ለሀሌ እቶም
- እብ ገሌ ሕማማት ለተርፍ ኣለ(እግል መሰል ኣብ ጀባል)
- መሕፈደት ቤጭ ሆርሞናት እንዴ ትከበቱ ለለክሸቁ ምን ኣለበ

መሻክል ምግባይ መራቀብት ምክ (ሐንገል)

ሐገንነ ለራቅቡ ወሚዛን ሆርሞናት ለልዕቅብ ህይፖታላማስ ወፒቱታሪ ለልትበህል ቅደድ ለነዝሐ ሆርሞናት ኢትመሳኒ ምንገብእ፡ እት በደ ዓደት ሌጠ እንዴ ኢገብእ እት ዓም ሀለዮትለ አንሳይትመ ብቅት እግል ተህሌ እሉ ትቀድር።

ቀጸር ቅደት ፒቱታሪ እብ ሰረጣን ረክሰ ምን ልትጨቀጥ

- *ገሌ ጅረሕ ምን ሳድፍ
- *ሕማም ቲቢ
- *እግል ሰራይ ሰረጣን ረክሰ ለልትነሰክ ጮሬሕ
- *እግል ትቅጠን እንዴ ትቤ



ነብረ ካፍየት ሐቕ ኢትነሰክ

*ሻፍግ ነቃሰ ሚዛን ገርብ እብ ሰበብ ሰረጣን፡ ገሀይ ወለመስሉ ሚዛን ሆርሞናት እንዴ ሐምረገ ዓደት እግል ለአብዴ ቀድር።

ለካልኦይ ጅንሰ በደ ዓደት

ዕምሰነ ምር ሰብበ እግል ልግበእ ቀድር፡ ህቱ ኢገብእ ምን ገብእ ላኪን

እት መባትክ ሰርዐት መትፋራይ ገሌ መሻክል እግል ለሀሌ ቀድር

- ጽብ ናይ አፍ ርሕም በደ ዓደት ወመጸአት እት ክል ዓደት ሰብብ።


- መትጸባጥ ርሕም እት ኖሰኖሱ ዶል ለሀሌመ ገበይ ዓደት እግል ልድበእ ቀድር። እሊ እብ ሰበብ ነድእ ውላድ እቱ ገብእ አትናዳፍ ርሕም አው ዐመልየት ወለትፈናተ ዲብ መንደቅ ርሕም ለዐለ ረክሰ

ፈሽል መሕፈደት ቤጭ ዕንድር ርሕም ትለውለ



ምን ገብእ፡ ርክሰ፡ ዐመልየት ርሕም፡ አሰርየት፡ እግል ሰራይ ለተሆነ ጮሬሕ መሕፋደት ቤጭ ለአፈሸል። ለፈሸል ቀደም 45 ሰነት ምን ዕምረ ገአ ምንገብእ እት ኢዶሉ ለጀረ ልትበህል ዲብ ህለ ሐቕ 45 ሰነት ላኪን ምስል ጠለቅ ደቁስ ልትሐሰብ። እለን መስለ አንሳት ነቃሰት ኢስትርጀን ለልትበህል ሆርሞን ሰበት ለሀሌ ዲበን ዓጭሞታተን እንዴ ተክመ እብ ቀላል እግል ኢልትሰበር ምን ካልሰዩም ርከቅ ላቱ ነበሪት እግል ልንሰክ ልትመከረ። ወእብ ሰዓይት ሕክምነ ሆርሞን ክም ትትዐቀብ እለን ትገብእ።


ርሕም ማይ ለማልእ ሐሽክል ምን ወዴ



(Polycystic Ovarian Syndrome)

እሊ ሕማም እሊ ለበን አንሳት መብዝሐ ወቅት ዓደት ኢትመጸአን። ገሌህን ላኪን ሐዳይ ልትረአየን። በዐል እሊ ኣለ እሊ ሰለሰ ምሽክለት ልትረአየ ዲበ

1. ዓደት ትብዴ ምን
2. ትገዝፍ፡ ሐበት ሽባብ በዜሕ ዲቤ እግል ትበረሕ ወሽክም እግል ተኣብቅል ትቀድር
3. ርሕም ማይ ለምሉእ ሐሽክል ለሀሌ እቱ፡ ምስሉመ



ኢንሱሊን ሰኔ ሰበት ኢሸቄ እቱን ሰከሪ እግል ሊደየ ቀድረ።

ሰራይ ናይ እሊ ትመስል ሓለት እት ቴለል ናይለ አንሳይት ልትንከብ። እብ ዓመት ላኪን ክል አንሳይት ከባደት ገርብ እት ብትከት ሰኔት እግል ትጽበጥ እግል ትጀሀድ ብእተ።

ብዝሐ ሆርሞን ፕሮላክቲን

ፕሮላክቲን ለልትበህል ሆርሞን ምን ቅደሱ ዜደ ምን ገብእ ዳይም በደ ዓደት እግል ልሰብብ ወአጥባይ ሐሊብ ክም ጀሌሕ እግል ሊዴ ቀድር። ሰበቡ ብዙሕ እመር ኢኮን። ገሌ ምን አግደ ለልትበህል ሀዩ ሰረጣን ቅደት ፒቱታሪ፡ ቅደት ታይሮይድ ለተአፈርዮ ሆርሞናት ቅደሱ ምን ልውሕድ፡ ገሌ ጅንሰ አድውየት፡ ነሐር አንሳይት ወእብ ፍንቱይ ሐልመት እብ ትሉሉይ ልትማተም አው ልትጠቤ ምን ገብእ፡ ሕማም ዓሳብ መቅደድ ምን ብእቱ፡ ሕማም ሐገን ምን ለሀሌ እቱ ፕሮላክቲን ሆርሞን ቅደሱ እንዴ ዜደ ሐድ እግል ልብዴ ሰበብ ገብእ።

እሊ ለተሀደገ መሻክል በደ ሐድ ለብእትን አንሳት እት ወክድ-ሰኔ ዲብ ሐኪም መጽአየ ምን ገብእ እግል ልትሳረየ ክም ቀድረ እንዴ አመረየ፡ እብ ወቅተን እግል ልትነፈዕ ልትነሰሐ። ክምለ እሉ ረክነ ገሌ በደ ሐድ፡ እብ መሻክል ክበድ እግል ልግበእ ሰበት ቀድር ለሸፍንት ራድኢት ለሐዜ። እሊ እንዴ አመርነ ውቀት እንዴ ኢተሐልፍ ደወ ክም ረክበ ኒዴ።

ዴማት፡ ክታብ “አርወሐትኪ አተክሪ”

እብ መ/እድሪሰ ሓምድ (ኮምፕዩተር)



አሳር

በቃዐት ሆቴላት ለልሐድድ ሓጃት አሳሲ

ዐወት ክንፌ

ቂርአት ዓሙድ አሳር፤ እት ናይ የም ሰፍሓት አሳር ምስል በቃዐት ሆቴላት ለልሐድድ ሓጃት አሳሲ እግል ነአትአምረኩም ቲ። እግልሚ ክል ነፈር እግል ዝያረት ኣካናት አሳር ወታሪክ ክምሰልሁመ ጠቢዐታይ ርዝቅ ለቡ ድዋራት ዐድነ እተ በጹሕ እቲ ወክድ፤ ክዳማት ሆቴላት እግል ልርኩበ ምህም ሰበት ገብኢ፤ እሊ ጽበጥ እሊ ህዩ እት ሐደዶት ለልሐዝዩ ህለ ሆቴል እግል ልሰደዩ ሰበት ቀድር እግል ንቀድሙ እግልኩም ቲ። እት ለሐልፈ ጽበጥ ጀሪደት ኤረትርዮ ሐዳስ 3ይ ክፈል ቅዱማም እግልኩም ዐልኹ። እቲ ህዩ እለን ለተልየ ቅዱማም እግልኩም ዐልነ 7. ከጥ ፈሻት ፤8. ዕግልት ገበይ መትከባት ተለፋን 9. ቀላል ወጥዕም ነብረ ለልብለ ሰለሰ ንቅጠት ምነ 10 ንቅጠት ዐለየ። የም ህዩ 10^ይ ወናይ ደንገበ ንቅጠትለ ክቲብ እግል ንርኤ ቲ ቅራኣት በኪተት።

10. አሰሉብ መትከባት ወሳርሖት ጋሽ



እት አተማንያት ወረደሖት ደሚር ጋሻ ምህም ዶል ለልተልሄ እት ኣካን ኩቡቲ ጋሽ ለገብእ ናይ መትከባት ወሳርሖት ኣግቡይ ሂገ ዶሩ ሰኚ ወአማን ምህም ቲ። እትሊ ወክድ እሊ ህዩ እት ልትላመድ ወሰኔ ገይሰ ህለ። እግል መሰል፤ ጋሻ እብ ኖሶም እት ሆቴል እንዴ መጽአው ገብእ ለዐለ ሐጅዝ እንዴ ተርፈ፤ እብ ኢንተርኔት ገብእ ህለ። እብለ ገይሱ ለህለ ኣተላለ ምንገብእ ህዩ፤ ገበይ መትከባት ጋሻ እብ ተማመ እብ ኢንተርኔት ወወሲለት ቴክኖሎጂ እግል ትግበእ ቲ በህለት ቲ። እሊ እግለ ናይ ምህዞ ወተቅዩር እንክሩ ለሽምል እት ገብኢ፤ እት አሰሉብ መትከባት ጋሽ እህትማም ለልአትሐዝዩ ናይ ምህነት አደብ ህዩ



እሊ ለተሌቲ።

ሀ) ወዳሕት፤ ጋሻይ እት ሆቴል ምነ ለኣቲ እት ኢነት እንዴ ኣንበተ አሰክ ፈግር ለናይ አማን ወዋድሕ ሐብሬ መምሬሕ (orientation) እግል ልትሆቡ ወጅቡ። እሊ ለበህለት፤ ለጋሻይ እት ሆቴል ለጸንሕ እቲ ወክድ ለልአትሐዝዩ ክዳማት እግል ልርኩቡ ሚ እግል ሊዴ ክም ቡ ወአዩ እግል ሊጊስ ክም ቡ እብ ዋጅብ እግል ልትሐበር ቡ።

ለ) ሽፋንት፤ እብ ክድመት ኢንተርኔት ልግበእ ወእብ ኖሰክ ለገብእ አሰሉብ መትከባት ወፈጊር ጋሽ እበ ሽፍንት ገበይ እግል ልግበእ

ለገብእ ጋሻይ ለልተለዉ አሰሉብ ሐቲ እግል ልግበእ ቡ። እብ ሽቃላ ሆቴል ለትትሆብ ክድመት አምር ለሐበረ ፈናታይ አሳሰ ለወደ ዶል ገብኢ፤ ለጋሻይ ሰክበት ደሚር ወርዶሐት እንዴ ረክበ ደማት ኖሰ እግል ልጠውር ሰበት ኢቀድር፤ ዘቡን እግል ልግበእ ኢኮን እብ አፍ ባብለ ሆቴልካም እግል ልሕለፍ ኢልሐኪ።

እሊ እት ለዐል ሰሙይ ለህለ ንቃጥ ኣግደ እት ገብኢ፤ እብ ዱቅሪ ወወለት ገበይ እት ጋሻን ተአሲር ለወዱ፤ እሊ ለትሸርሐ ነዋቅስ እንዴ ፈረማ እግል ለሐሰ ሂበት ክዳማት እግል ሽቅየት ጎማት ለኢሊሐኪ ጋር ቲ። እትሊ የም ለልትቀደም ክቲብ ለእብ ልሙድ ዘቡን እንዴ እንቤ ለእንሰምዩ እብ ጋሻይ ለትብል ሰሜት ቅዩራሙ ህሌ። እት መአሰሳት ሄይበት ክዳማት እግል ልትሐደሩ ለመጸ ዘቡን ክም ዘቡን ተጃረት ልትርኢ፤ ክም ዕዱም ጋሻይ እግል ልትርኢ ከአሰክ እሕትራም ክምቡ ልሽዕር እግል ንትሐደሩ ብኹ።

ሽቃሰ ሆቴላት ክምሰል እሊ እት ለዐል ለትሰመ አሰሉብ እብ ደርሰ ሌጠ ለልትሆብ እንዴ ኢወድዉ እብ ሽቅልመ እግል ለአርእዉ ወጅቦም። እብሊ ህዩ እግል ክል ጋሻይ ለሐሰ መትሐዳር ወሻፍግ ክዳማት እንዴ ረክበው ደሚርም ክም እንሰልብ ወእብ ክሰሰለ መአሰሰትን ዝክርያት ለኢብዴ ክም ነአተላልዮም ሀደፍ ክልነ ልግበእ።

ቡ። እት ረኣሱ እግል ሽፋንት አሰሉብ ደፍዕየት ለከሰሰ ለገብእ ሆቴል እበ ሕኩመት ለአፍገረቲ እግሉ መምርሕ እብ ሽፋግ እግል ልትመም ቡ።

ሐ) ፈናታይ ለአለቡ፤ ጅንሰ ወአግቡይ ለትፈናተ ሆቴላት እግል



እተ እት ሰነት 1913 ለትከበተ ክታብ ሐልየት ትግራይት ምን ሐይለት ዐድ ተክሌሴ እት ገጽ 420 ዓምር ወድ ዐጁብ እግል ምድር ዐድ ተክሌሰ ምን ሐመዎ ህቲ ህዩ እት ለሐምዱ እሊ ሐሊ።

ሀበሮ ዎ መንታይ አፎ በዝሐ ለሐምያቲ ዲብ ዘበን አበውነ ለእክሉ አክል ሐጻቲ ወእሊ ሲርቀት ትብሎ ዘበን አዜ መጽአ ቲ እግል ነዐይሮ ለዕጩመ እንዳ ቲ ለአድግ ጋብእ ዐጠልማይ ኢተልያ ቲ እማቲ አበንጉለት ወአሰቃቅ ልጎ ወጋድም ለውያ ቲ ምን ክልኤ እት ዐቅበት ክርበ ቀረጽ ለሰዐራቲ እጋል ዐሰም አሰትዮ ለደርቡ ቲረድ እማቲ ገብገብ ጋብእ ዝላለ ማልአት እንተ መራቲ ክም-ጎፍ ወመጽሖት-እምበጠ አጊድ ትረጅዕ እማቲ እገር-ሰሐቶ ለክብት ረቢ ከአፎ ማንሃ ቲ መቀር ዲብለ ረወርብ ወመሐረጥ እትለ ሳሳቲ ምን ትትከፊ ቃር-የበል ከምንዲ ትሰቲ ለአጽያቲ ወድ ከረዶት ወገዓር እጋል ጽእራን እላ ቲ ለቀድሐት ወድ ድብሎይ ዕድረ ወርድ ሌጣ ቲ ተረክበ አንቅዕ እሊ ለመሓዝ እትለ ዒጻቲ ጋድም ሕመር ወጨዶሐት ማይ ሾፍ እብለ ወግአቲ እብ ሓዚለ ሽቢቦት እሊ መሰከብ ቀልሃ ቲ ምን መጽማት እት አርድ እሊ መሰከብ ጥቅራ ቲ ምን ቀላቅል ደብርቲ ብዙሕ ትብሌዕ እማቲ ግርዕ ምንዲ ትደፊ ማይ ለተንክር ብጽዓ ቲ ለተሐለበት ትትሐለብ እምብለ ለብዝሕት ምክያዱ ለሐዳት ቅመዕ እብ ቀጢን አክል ብዝሓት እላ ቲ መዝረት ወፈንክ ወድ ዕንድር ሊፈት ወፍሉይ ቀዳዱ ከረም ተቀብል ዲብ ጥረት ዕንሱብ ለዓይረት በክራቲ ሽላል ለቀጠ ዝገነዝ ግልሓይት ትገብእ ባክራቲ እንዜ ወኬን ትትዓዲ ተበልዕ ምንለ ገልዋቲ ሰምጥ ቀረፍ ወአብ-ዋጥል አሐ ለአውለት ሰብካ ቲ እት መነትል ወግርበት ግርዕ ሐጨር ለሰዐራቲ ቀደደ ለእበ ልትነበር ማይ ዝልዝለት ቡ ዲብ ተሓቲ ማይ ዝልዝለት ለምዕጥን ሱራት ረቢ ድሕራ ቲ ወአት መክሸን ኢትፈርህ ወቅለዕ ታርፍ ሰልያቲ እት ሰጋይዱ በለቲት ቡ ወእበን ኩቡብ እት መሓዙ ጸዐደ እንቲ ልትበገስ ባሊ አቲ ልባሱ ለአትውሕዝመ ምንዲ ለአመሴ ቃ'በት ተአቲ እማቲ እግል ነሐምዶ እሊ መሰከብ ደሐና ቲ ዎርት እናስ ነብሮ እብ ቤተቲ ወወአቲ ለሰሕል እግል ኢነሐምድ ብዝሕት ህሌት ኮናቲ ሐባብ ዎ ጸርነ በዲር ቃውየት ጎማቲ ሹም ሞተ ኢሰዐነ ከጊሰ ምኑ ቀጸፋ ሹም እንዶ ልጸበጥ ነሱእ ምኑ ልባሱ ሰምሓኖ ጅምዕ ወድ ጃውጅ ምን ሰምዩ መርባቲ የም ሐሁ ወሀለ እሊመ ጅምዕ ወአታ ቲ ሸሩ ልክለአና ቲ ከለእ ለቀደሕ ዕንታቲ።

ሸባብ

ሕዱግ ሰሌማን



ሸባብ፡ ዋልዴን ሳልሐም እግል ልግብኦ

ወፍቲ እበ በደል ልዐቤ፡ ጅን ምን ገበዩ ሸክፈ ምንገብኦ እግል ልትጃዜ እቲ ወገበይ ክም ነሰኦ ውድዮት መስኡልየትለ ሻብ ኡብ ቲ።

3. እት ሐያት ውላድክ ተኣሲር እግል ለሀሌ እግልክ ቡ



ለአግደ ወምህም ክም ተ ሰብ መቅደረት ዕልም ልባብ ልሐብብር፡ እግልሚ ክሉ ለእግሉ ትወዴ እኩይ ልግበኦ ወሰኒ ተኣሲር ለወዴ ሰበት ገብኦቲ። ሰበት እሊ ለእግሉ እግል ቲዴ ተሐዜ ለሀሌገ ጋር ኣመርት እብሊ ህዩ እንተ ክም ሻብ ኡብ እንዴ ደገግክ ወሩግክ ቀራር ምን ትነሰኦ ለሐሳቲ፡ እሊ ወክድ ወዴ ህዩ ፍገራትለ ምስዳር እግል ትዳሌ እግል ወእብ ቀሊሉ እኪትመ ገብኦት ምንገብኦ ሕሉል እግል ትባሰር እግል ለሰዴክ ሰበት ገብኦቲ።

2. ምንቅያስ ወለዐል ውላድክ ኢፍትየት

ውላድክ ምን ቅያስ ወለዐል ኢትፍተዮም ልትበሀል እት ህላ፡ ውላድክ ሻም ዋልድ ሐርሞም በሀለት እንዴ ኢገብኦ፡ ሰንንኦ/ ደለዕ እግል ኢልልመዶ ለጃዜ ወለ ሰይሕ ዋልዳይ ክም እንታመ እግል ልኣምር ህለ እግሎም ለበሀለት ቲ። እብ ራትዐት ገበዩ ለልሄርር ፈዳብ ወመንተብህ ውላድ እግል ትረቤ ገብኦክ ምንገብኦ ምን ቅያስ ወለዐል ለገብኦት ፍቲ ወረሐመት ክምስል ኢልኦትሐዜ እንትበህ ለኣትሐዜ። ሰበት እሊ፡ በደል ምን ቅያስ ወለዐል ለገብኦት ረሐመት

እት ሐያት ውላድክ እንዴ ኣቲክ እግል ትሻርክ ወወክድ እግል ተህበ ሸቅል ትሩድ ለልሐዜ ምንመ ገብኦ፡ ምህመትክ ክም ኡብ ውላድክ እብ ገበይ ሰኔት እግል ልዕቤ ከዲም ሰበት ገብኦ፡ ለእግሉ ከሰርክ ዘበን እንዴ ከሰርክ እት ሐያት ውላድክ እንዴ ኣቲክ እት መርበዮተ ዶርክ እግል ትቀድም ላዝም ቲ። እሊ እግል ቲዴ ህዩ እግሎም ለገብኦ ወክድ እንዴ ፈንቴክ እብ ቀደም ትሌ ሸቄ እበ። እሊ ዶል ትወዴ ህዩ ውላድክ ለልሐዝዉ ሓጃት እግል ተኣትምም እግሎም እብ ትሉሉይ



ተሌ

እት ውላድክ ለትተለዩ ገበይ ዕበያት ምስል ዕምርም ኣምርም ወደረጃቶም ለገብኦ ውደዩ። እሊ ህዩ ምስል ዕምርም ወደረጃት ተዐሊሞም እንዴ ተኣትመጣውር፡ እት ጠባይም ለልትርኤ መታክል እግል ባልሐት ሰደዮም።

ውላድክ ለልኦቀሩቡ እትክ ጠለብ ክል ዶል “ኢፋልኩም፡

ኢበትኮ እግል ልዕበው ሰድዮም። ከእንተ ክም ሻብ ኡብ ንዩት እንዴ ወዴክ ምስል ውላድክ ለገይስ ኣግቡይ ዕበያት እግል ትተሌ ላዝም ቲ።

5. ቀዋኒን ቤት ኣፍገርት


ክምስለ ሾክት ምን ንእሽ ትበልሕ ለልትበሀል፡ እብ ሐደስ እንዴ ትበሀል ለልትመሰል፡ ጠባይዕ



1. ለትወድዩ ሓጃት ኣመርት፡
2. ምን ቅያስ ወለዐል ውላድክ ኢፍትየት፡
3. እት ሐያት ውላድክ ተኣሲር እግል ለሀሌ እግልክ ቡ፡
4. ምስል ውላድክ ለገይስ ኣግቡይ ዕበያት ተሌ
5. ቀዋኒን ቤት ኣፍገርት ለልብል ጽበጥ እትለ ጥብዐት እሊ እግል ንርኣዩ ቲ። እት ትመጽእ ለሀሌት ጥብዐት ህዩ ሐምስ ንቃጥ ብዕድ እግል ንርኤ ቲ።

1. ለትወድዩ ሓጃት ኣመርት

ክምስል ኣዳም እት ኣለት ዓፍዮትክ ምንገብኦ ወእግል ብዕዳም ለትወድዩ መትከናካን፡ ውላድክ ምን ክሉ ለእግሉ ትወዴ



ናይ ምክ ወናይ ሓጃት ጠለባት እት ተኣትምም እግሎም እግል ትሄርር በክት ለልሀይቦካቲ። እት ህቶም ለወድዉ ወራታት ህዩ እበ መቅደረትክ ለትሰምሐ እዴክ ሓበርትመ፡ ሓለት ኣጀኒትክ እት ክሉ መጃላት እብ ቀሊሉ እንዴ ኣመርክ እት ዐቦት ምኑም ወገርጦም ዶር ዐቢ እግል ትቀድም ሰዴክ። ሰበት እሊ እት ሐያት ውላድክ እንዴ ኣቲክ ተኣሲር ሰኒ ክም ተሐድግ ክደም።

4. ምስል ውላድክ ለገይስ ኣግቡይ ዕበያት

እብ መክበር ወጣጥ ሸባብ ወደብ ኢድገፍ ለትጥላሌ ሰጃሕት

ውላድክ እብ ንእሾም እት ህለው እግል ትራቅቡ ህለ እግልክ። እሊ ኢወዴክ ምንገብኦ ክም ዐበው ክምስለ እንተ ለትሐዝዩ ኣደብ ወጠባይዕ ወእበ እንተ ለትሐዝዩ ገበይ እግል ልሄር እግልክ ኢቀድር። እብ ኣሳስ ሐብሬ ዕልም ልባብ ክም ዋልዳይ ላሊ ልግበኦ ወኣምዕል እሊ ለተሌ ሰለስ ሰኣል እግል ትብለሰ ህለ እግልክ። ህቲ ህዩ፡ ውላጄ እተየ ህለው? ምስል ውላጄ ምን ህለ? ውላጄ ሚ ወዱ ህለው? በል።

ምን ወክድ ንእሾም እንዴ ኣንበተው ምንክ ለልትዐሉሙ መምርሒታት ክም ዐበውመ እት መርበዮት ሐያቶም ዶር ሰኒ እግል ለሀሌ እግሉ ቲ። ሰበት እሊ እብ ንዝም ለተቤ ገበይ እት ቤቶም እብ መምርሕ ወቀዋኒን እግል ለጊሶ ናይ ኖስክ ቀዋኒን ቤት እግል ተኣፍግር እግሎም ህለ እግልክ። እሊ ህዩ እት ኣደቦም፡ እት ዐቦት ገርቦም ውበዕድ ለሰድዮም መምርሕ እቡ ክም ለኣቲ ወፈግር ውደዮም።

ልተላሌ ...

ልግብ

ቃኑን እግል ግሉላም ሕጃብ ኢገቢእ እሎም ሕፋዝ

እለ ሕሰበት በህለት፡ “ቃኑን እግል ግሉላም ሕጃብ ኢገብእ እሎም ወህፍዝ” ለትብል ብዙሕ ዶል ትትሰመዕ። ከድግም ናይ እሊ በሂል እሊ ለተአትፈክር ሌጠ እንዴ ኢትገብእ፡ ብዙሕ ዐቅል ወቃሽሾት ወምኑ ወኬን ዐቢ ልባብ እንዴ ተሓበረ እተ ትትረኩቡ።

ከዎሮት ወድ አምሪክ ላቲ ነፈር ዐለ ልትበህል። እሊ እናሱ፡ ህቱ ወዐይለቱ እት ሰኔ እኩይ ላቲ ሕግላን ነብሮ ዐለው...ለሓለቱ ወሓለትለ ዐይለቱ ወለዐለው እቲ ሕግላን እግለ ለልርኤ ብዙሕ ለአርሕም ወለአሰፍ ዐለ። ከምዕል ሐቲ ለእናሰ እንዴ ትገሰ እት ለሐሰቡ ገሌ ሰኔ ዐጂባት ላተ ፍክረት ትቅብ ቴለቱ! ከለፍክረት ሚ ዐለት ገብእ?

ለፍክረት ምነ እቲ ነብር ለዐለ ሕግላን ለተአረይሙ ፍክረት ተ ዐለት! “ለፍክረት” ምነ እተ ዐለ ሓለት እት ብዕደት ሓለት ለትበድል ፍክረት ተ.. “ለፍክረት” እግል መሓዝ ሐያቱ ገበይ ሐዲሰት እግል ተአጽብጥ ለትቀድር ፍክረት ተ...

እለ “ፍክረት” እግል ወድ አዳም እብ አማን ገበይ ለተአጽብጥ ወክሉ ለገብእ ክጠጥ ልግበእ ወመለገብእ ልግበእ ወቀይ እት እዴ ዐቅል ክም ቱ ለተዐልም ፍክረት ተ።

ለፍክረት እሊ እናሰ ሰኔ ፈዳብ ላቲ ዐቅል ክም ቡ፡ ምናተ እሊ ፍድብፍህ እት አሰክ ፈዳእ ልልትሃብ ሳናክ፡ አውመ ፈጊር እት ረአሰ ወሬሕ ኢኮን.. ለፍድብፍህ ዐቅል፡ እተ ቀሊላት ዘያታት እንዴ አፍገርከ እተ እለን ለናሰብ አካን ዶል ትትነፈዕ እበን ቱ!

ለእናሰ እት ጀራይድ አምሪክ ዎሮት እዕላን እግል ልንሸር ቀረረ..ከለእዕላን ሚ ዐለ ገብእ፡ እዕላን ምን ሕግላን ለለአረይሙ ወእት ገበይ ጽጋብ ወቅነ ለለአሰርር እቡ..እብ አማን..ከእሊ “ዐጂብ” ላቲ እዕላኑ ዐለነዩ..ዲብለ ጀራይድ ...ከእሊ ተሌቲ።

“ጽጉብ ወበዐል ማል እግል ትግበእ ዶል ሐዘኪ..ዎሮት ዶላር ሌጠ ለአክ፡ ለእሉ ትልእክ ዶላር ህዩ ዲብ እሊ ተሌ ዕልብ ሰንዱቅ በሪድ.....ሐቅ እለ ወዴክ ምን እለ ወሐር እንተ ምነ ዲብ እለ እዲነ ለህለው ጽጉባም ዎሮት እግል ትግበእ ቱ።”

እሊ እዕላን ክም ፈግረ እብ መላዩን ለልትዐለገ አንፋር ተሬ እት ልብሎ፡ ወዎሮት ዶላር አሰክለ ትበህለ ዕልብ በሪድ እት ነዶኦ አንበተው። ምን አመረ እለ ጽጋብ እለ ረቢ ምን ቀሰም እሎም እንዴ ቤለው ቱ፡ ወሐር ህዩ ዎሮት ዶላር እግል ዎሮት ነፈር ብዙሕ ለለአትሻቅል ጋር ሰበት ይዐላ ቱ...ምናተ እሊ ፈዳብ ዐቅ'ለ እናሰ ጽጉብ እግል ልግበእ ዎሮት ዶላር ሌጠ ክም ከፍዩ ሐደዶቲ፡ እግለ ተየልል ክመ እቲ ይሙሙ ለዐለ እግል ሊጊስ ቀሊል ወይሰር ወደዩ... ወሐቅ ሐዳይ ወቅት እሊ እናሰ ፈዳብ ለእሉ ለሐዘ ዐለ ጽጋብ እት እዴሁ መልከዩ። ምን እሎም ለልልኦ እቲ ዐለው አዳሚን የም አለቡ ሚልዮናት ዶላራት ሰበት ትከበቱ፡ ምነ ህለው ለልትበህሉ ሚንዮኔራት ገብእ! ከእሊ መላዩኑ ክም ትከበተ ምን ሐዲሰ ብዕድ እዕላን ከትበ ከእተ ጀራይድ ነሽረዩ..ከእት ሐን “እብ እለ ትመሰል ገበይ ቱ ለጽጉብ ትገብእ!” ለልብል አርእሰ። ዎሮት ነፈር ዎሮት ዳላር እንዴ ነድኦ ምልዮኔር ለትገብእ እበ ገበይ እብ ተፋሲል.....አሰክ አክረ ሸርሐዩ። ወእት ደንጎላለ ሸርሐ፣ ከእብ ክምእነ ትመሰል ገበይ ቱ ለጽጉብ ትገብእ ቤሊ..!

እሊ እዕላን ለሓይራይ ክም ፈግረ፡ ለአዳም ሸካዊሆም ቀደመው፡ ምናተ ለመሕከመት ለሀቡቲ ረድ ክም እስትህዘእ ለብእቱ መሰል ዐለ፡ ህቱ ህዩ፡ እሊ በዐል ዐቅል ፈዳብ ላቲ እናሱ ሐቁ ለተይብ ወሰኒ እምርት ላተ ዘዐት፡ “ቃኑን እግል ግሉላም ሕጃብ ኢገብእ እሎም ወሕፋዝ!” ልብል ዐለ።

በህል እመራም

- እበ ደሩሪ ላቲ አንብት፡ ሐቀሁ እትለ መምክን ላቲ ተዐዴ፡ እለ ወዴክ ምንገብእ አመተ ለይዐለት እግልክ ነፍሰክ ምስተሓለት እት ወዴ እግል ትርከባ ቱ።” (ፍራንሲስ ቤኮን)
- ሐት-ሐቲ ዶል ለሐሰ ዲብ እለ እዲነ ለወዴካሁ ወቀይ፡ እንተ አሰክ እለ እብ ካምል ዐቅል ሀለዮትካ ቱ፡ ወእሎም ክሎም ግሉላም ክለባምክ እት እንቶም እንተ አሰክ እለ እብ ዐቅል ወልባብ ትትዓመል ሀለዮትካ ቱ።” “ነጂብ ማሕፋዝ”

ጠዓም

- ክልኤ ሰንዐት እግል ወድ አደሚ አሰክ ፈነ ለአሸክታሁ። እብ ሓልፈትክ ዶል ትትሻቅል ወእተክምሰልሁመ እብ ብዕዳም ዶል ትትሻቅል። ከባብ ሓልፈቱ ለከርከሐ ሓራቱ (ምስተቅበሉ) ለአበዴ፡ ውበዕዳም ለአውዐለ ህዩ ሰር ራሐቲ ለአበዴ!

ፋሬሕ ወልወቅ ለወዴክ ዕልማይ ሐቃይቅ

- እት ጃምዐት ብሪሰቶል ለገብአት ድራሰት ክመ አከደቱ፡ እት አምዕሎታት ሸቅል ርደደት ለወዱ አንፋር ለሐሰ ተፋዑል ለአርኤ። ወምነ ርደደት ለኢወዱ ወልዐል ልወቃም ቶም።
- እግል ምስተቅበልክ ለትከሰስ ክጠት ዶል ትረስም፡ ወለ ዎሮትመ ምነ እሎም ራሰም ዐልክ አህዳፍ ኢትብጸሕ፡ ፈርሐትክ ወለውቀትክ እትለ ሐሰት ደረጀት እግል ለሀልዶቱ። ከእለ እት መጀለት እት ዐመል ለልውዕለ አብሓሰ ለትነሸረት ድራሰት ክመ ሐበረቱ፡ ደረጀትለ ፈርሐት ለእት እግል ትሳፍር እንዴ ትቤ ለትወድዩ ክጠት ተህይባካቱ፡ ምነ እትለ ዶል ሰፈር ኖሱ ለትረክበ ለውቀት ወፈርሐት ተዐቤ ትቤ!
- ለበዝሐው ምኒነ ሰካብ እግል ርሽድ ዓፍዮት ምህም ክም ቱ ለአምሮ። ምናተ ለበዝሐው ሰካብ ፈርሐት ወለውቀት ክም ጀልብ ላቲ

ኢለአምሮ። ከአክልመ ካሬ ላቲ ሳዓት ሰከብካተ ምን ሐሩቀት ወምን መትሳዳድ ዓሳብ ትድሕን።

- እትለ “ሓይሰት እዲነ ሚ ትመሰል?” ለልብል አርእሰ እብ ጃምዐት ሃርሻርድ ለትጋዩሰት ድራሰት ክመ አከደቱ፡ ኬልቃይ ወረቢ ህለ እንዴ ቤለው ለለአምኖ፡ ወምሰለ ክም እሊ ናዮም ኤማን ለሶም ምጅተመዓት ለነሸጦ አንፋር፡ ምነ ዲን ለአለሶም አንፋር ወለዐል ልወቃም ወፋርሓም ክም ቶም አከደት።
- እተ እት ሰነት 2007 እት ጃምዐት ቶተንሃም ብሪጣንዩ ለገብአት ድራሰት፡ ፕሮፌሰር ኢያን ማክዶናልድ ለአከደዩ ጋር፡ ለአንፋር ለካካው ሕፋን እንዴ ሰተው ቺኮላተ ለበልዶ፡ ሄራር ደም እትለ ደምቀቶም እብ ቅደሰ ምን ክልኤ አሰክ ሰለሰ ሳዐት ወሰከ። እሊ እምበለ እት እንትባሆም ለትረኤት ዝደደት

ቱ። እተ ክምሰልሁመ እት ገሌ ምነ እሉ ወዱ መጻግምመ ገሌ ሰን ልትርኤ።

- ሐቲ ዲብ አልማንዩ ለገብአት ድራሰት ክመ ሸርሐቱ፡ እምበል ቃብል እግል ብዕዳም ለትወድዩ ሰዳይት፡ ለሐሰት ለውቀት ወፈርሐት ትጀልብ እግልከ።
- ዲብ ጃምዐት ውላዩት ሚሺጋን ለገብአት ድራሰት ክመ አሰአለቱ፡ እት ክድመት ዘባይን ለሸቁ አንፋር እግለ ዘቡኖም ለለአርእው ናይ ወሀም (ናይ ሐሰት) ሰሓቅ፡ እግለ መዛጃም ሰበት ተአፈሰዱ፡ እት ደንጎበ ዲብለ ምን ሸቅል ለለአዝሞ እተ ደረጀት በጾሐ። እብ ዐክሰ ናይ እሊ ህዩ፡ እሎም ለናይ አማን ወምን ልሶም ለትበገሰት ሰሕቀት (ፍሽክ) እት ገጽለ ዘባይኖም ለወዱ ህዩ መዛጃም እት ሰኔ ገይሰ ወክለ ፈትረትለ ሸቅል ልወቃም ወፋርሓም እት እንቶም ለአከለሱ።

ምን ዐጃይብ እዲነ

- ህኑድ ቀይሐት፡ እሲት ወልደት ምን ገብእ ክመ ክሉ ለለአምረ እት ቤት ሕርሰ ኢትትገሱ፡ ምናተ እት አካነ ወቅትለ ሕርሰ ለእናሳቱ ለእተ ዐራት እክፋር እት እንቱ ለሓልፈ። እሊ ህዩ እግለ ደለ አኬት ተ ለትትበህል እንዴ ቀሸ፡ ለእኬት ምን እሲቱ ክም ትረይም ወእት ረእሰ ሐበትመ ክም ኢትጀሬ እግል ትግበእ እንዴ ትበህላቱ።
- ዲብ ሰላሳታት ናይለ ሐልፈ ክፈል ዘበን፡ ሲንጋፖር እብ ገበይ ረስምየት እግል ሀቡይ ክም ምወዘፊን እት ሸቅል ትፈርርም ዐለት። እሊ ህዩ መሰኡሊንለ ሸርከት ሀቡይ ፍሬለ ሰኔ ውቁል ላቲ ዕጪይ “ዐካት-ህንድ” እግል ትብተክ ውቅልት ሐለት ክም ዐለት እለ ሰበት ላሐዘው ቱ። ከእሊ ሰኔ ውቁል ወወቅት ወሐለት ብዝሕት ለለሐዘ ዕጪይ፡ እብለ ሃቡይ ፍሬሁ ክም ለአቲ ገብእ ዐለ።
- ዑለመ ክመ እግል ልትአከዶ ምኑ ለቀድረው፡ ንህብ እንዴ በዴት ምን ገጽ እሊ ምድር ክሉ ረእሰ ዶል ሰርተት፡ ዲብ እለ ምድር ለህሌት ሐያት እብ ሓለ እት ቀበት አርበዕ ሰነት እግል ትብዴ (ትሰረት) ክም ቱ አከደው።
- እሊ ለተለፍዝዮን ክም ፈተሕክ፡ ወለ እት ሐቲ ቀናት እንዴ ኢነአጽብጡ ለልትርኤ ተሸዊሽ፡ ሰበቡ እንጭሮረሓይ-ራድዮ ለምን ወቅት ቀዳም፡ ምነ ዐቢ መትፈርገዖት ኮን ለሐሰለ እቲ ወቅት ለተርፋ ቱ።
- ለቀሌት ቤት ዲብ እለ እዲነ ዲብ ህንድ ትትረኩቡ። ተበን ናይለ ቤት ዎሮት ቢልዮን ናይ አሚሪክ ዶላር ገብእ፡ ወዎሮት ምነ እመራም ሰብ ትጃረት ህንድ መልከ።
- ምነ ሰኔ ዐጃይብ ላቶም እዕላናት ዲብ እለ እዲነ፡ ዎሮት ምነ እመራት አካናት ትጃረት አክራንዩ ለወዴቱ እዕላን ቱ፡ እለ አካን እት አዝበዮት ሞባይላት ቱ ለትሸቁ። ለእዕላን ክምእነ ልብል፡ “እት ጀዋዝ ሰፈሩ ለህለ ሰም ዲብ “አይፎን” ወሰም ክርሱ ዲብ “ሰሶ” ለቀየረ ነፈር፡ እግለ አይፎን 7 ለኑዑ ሞባይል እብ ምንተሐት ዎሮት ዶላር እግል ልርከቡ ቀድር ልብል።

ተበሰም



- ክልኦት ደረሳይ መጦር ሕድ እት ገይሶ ለዎሮቶም እግለ መለሀዩ፡ “ህንድ አክል አዩ ረዩምነ ህሌት?” እት ልብል ትሰአለዩ። ለመልሀዩ ህዩ፡ “ዶ.ዐደድ እለ ረዩምነ ህሌት ኢመሰለኒ፡ እት ፈሰልነ ምሰልነ ለደርሰ ዎሮት ወድ ህንድ ህሌ፡ አሰሶሕ አሰሶሕ አሰክለ መድረሰት ዐጀለት እንዴ ትጸዕነ መጽእ!” ቤለዩ።

በህል

- ሐት ሐቲ ዶል ለእለ ትትሸነህ ክም ኢትረክብ ፍቅድ፡ ወምን አመረ በዐል በክትመ ትገብእ ኢኮን።
- ሰለሰ ጋሪት ሐሽም፡ ነፍሰክ ሐሽም፡ ብዕዳም ሐሽም፡ ወመዋዲትክ ሐሽም ወመሰኡል ምናም ግበእ።
- እኩይ ፋሉ ክል-ዶል እግለ ፋዲ ለህለ ሰር ናይለ ግራቡ ለለአቀምት ገብእ እት ህሌ፡ ሰኔ ፋሉ ህዩ፡ እግለ ምሉእ ለህለ ሰርሰ ግራብ ለለአቀምት ቱ።
- እግለ ምን ጽልመት ለፈርህ ጀኔታይ ሻፍጋም እት ሕነ እግል ንሳምሐ እንቀድር፡ ምናተ ለናይ አማን ምሽክለት እትለ እዲነ፡ ለዐባዩ ምን በርህት ዶል ፈርሆ ቱ።

መዕሉመት

- ሐለት አሰዑድ ወለት 25 ሰነት ላተ እሲት፡ አክል ሐለት አሰዑድ ወድ 65 ሰነት ላቲ እናሰ ትገብእ።

ዝበድ

ዘያታት

- ለሐናት ክም ሸንሀተን እግል ልትበደለ በክት ሀብወን.. ወአርወሐትኩም እግል ትትሐረር በክት ሆቢ..ወእግለ አልባብኩም ለልብለኩምተ አትንሱ።



እሊ ወጅህ ወለት ጁቱ መዕንታቼ?



በይ በይ አዳም ተመስል ሕድቱ፤ ለልብሰት ወጅተ ብሶት ሀለ አሻም ትግርንዩ ትመስል ላኪን ህተ ምን ጫድ ተ። ደሐን እብ ክሱስ ዓዳት ሸዑብ ጫድ እት ገበይን ገሌመ ሚኢነአምር? ከበርከት።

ሸዑብ ጫድ ምን ለትፈናተ ቀባይል ለትከወነ ዝያድ 100 ሀገጊ ለልትሃጌ ቱ። አሰሉብ ህዳይ እት መጅተመዕ ጫድ ለትፈናተ ምንማቱ፤ ስመዮም ሰኒ ቃሊ ሰበት ገብአ ለበዝሐ ወቅት እብ ንዩት ዐድ ወለት። ምስል ወለቶም እንዴ ተለ ለልትሆብ ማል እግል ኢልድፍዮ እብ ተቃርብ እግል ለአትህዱ ለሐሩ።

ዐድ ወለት “እግል ኢሊበሉነ ወምን-ምን ነሐምቅ” በሀለት ድንጉር አፍካር እንዴ ትበገሰው ምስል አዋልዶም ምን ቅድረቶም ወለዐል ማል እግል ለአትሉ ሰበት ልትቀሰቡ፤ ለበዝሐዩ ዓይላት ጫድ እብ ኢረኪብ ማል አዋልደን መምብለ ወወቅት ህዳይ ለሐልፍ ምንን። ምን አሳስ እሊ አሰባብ እሊ እንዴ ትበገሰው፤ ዐድ ወለት ምስል ዐድ ሕጻን እብ ስቱር እንዴ አተፈገው፤ መርዓዊ መርዓቱ እብ እዴ ኖሱ እግል ልክረፈ ወቤቱ እግል ልንሰአ ልትፋሆም በሀለትቱ። እሊ ከሪፍ እሊ ህይ ምን ዘመን ቅዱም ልሙድ ሰበትቱ ለለአትሻቅል ጋር ኢኮን። ምናተ ምን ተሐት 17 ሰነት ለዕምረን፤ ለውዳይ እሊ ኢክሰሰን ወሐሰለ ዲበን ምን ገብእ፤ ለመርዓዊ እብ ቃኑን ሰአል ቀርብ ዲቡ።

ለትከረፈት አው ለተዐዘገት ወለት፤ ምን ዐድ ሕጻን እግል ኢትፈረር አሰክ ሳምን ዳደባን ፈግሮ እግል፤ ሐቆ ሳምን ላኪን ዐሞታት ናዩ ከርፈዩ ሻብ እግል

ህዳይ ለአዳልያህ። እት ሳምን ሓሪት ህይ “ምስኮረ” በሀለት ዳስ ዐውቱ፤ ለልትበሀል ህዳይ ወዱ እግል ወዐደ ልትዐዘሞ። ሐቆ እሊ ህይ ማል ሐድ በሀለት ቅድረቶም እንዴ አትለወ ለአትህድወ በሀለትቱ። ሸዑብ ጫድ እግል ወለቶም ለለአተልወ ማል ምን ቀቢለት እት ቀቢለት ለትፈናተ ምንማ ቱ። ምን 1000 አሰክ ሚልዮን ዶላር በጽሕ። ሐቱ እት ለገብአ ህዳይ ለኢተርፍ ዓደት ምንተሀሌ ላኪን፤ 8 ግራም ለትትመዘን ሳንቲም ዐድ ሕጻን እግል ዐድ ወለት ለለሀይበ ህያብ ደሀብቱ። እሊ እምበለ እግል መርዓት ለልትሆብ ልባሰ፤ ሰርን፤ ዕጥር ሐማት ለልትበሀል ለቀለ ዕጥር ጫድ ቱ።

እት “በለለ” ለትትበሀል ቀቢለት፤ አሰሉብ ከሪፍ ኖንቲ ለቤላቱ። እብ አሳስ ዓዳት እለ ቀቢለት እሊ፤ ኢትበከረት እት ዐደ ሰበት ትወልድ ወትትሓረሰ፤ ብእስ ወቅት ወሊደ ዶል ቀርብ አሰክ ዐደ ሳርሐ። ሐቆ ወልደትመ አሰክ ሰኒ ተርድ እግል ክልኤ ሰነት ምስል ዐደ ትጽንሕ። ብእስ ህይ እት ዐድ ሐሙሁ እት ለአትቃብል ወእሲቱ ወውላዱ ለገብእ ፈዋኪ፤ ሰገ ወብዕድ ለትመሳነ መናት እግል ለአምጽእ ልትቀሰብ፤ ለብእስ ራክብ ገብአ ምን ገብእ ህይ ለወቅት ለዲብ ዐደ ትጽንሐ ምን ለዐል 2 ሰነት እግል ልግበእ ቀድር። ለሰኒን እሊ እግል ልክሀል ለኢቀድረ እናስ ምስል መልሂቱ እንዴ ትጋመ እሲቱ ወጅናሁ እንዴ አትሃመለ ለዐዘገም።

እምበል እሊመ ለመርዓት ቀደም አምዕል ፍጉራ፤ ሸሀር ታርፍ እት እንቱ፤ አምዕልክ “አልመቀር” ለትልበሀል ሰኒ ቅዱይ ላቱ ዕጩይ ትሰሕን።

“አልመቀር” እምበል መርዓት ወወእብ ብክረ ሐራስ ላተ ብዕደት አንሳይት እግል ትሰሐኑ ኢልትአጀዝ እግል። እተ ክምስልሁመ ወለት-አዋልዶ እደዩ ሌጠ ትትሐነን እት ህሌት፤ እሲት ላኪን እደዩ ወእገረ ትትሐነን። ለለመድ እሊ እት ገሌ መጅተመዕ ቀምየት ትግሬመ ልሙድ ቱ።

መርዓውዮታት ጫድ እግል አርበዐ አምዕል ምን ቤት ኢፈግሮ። ለአወላይት ሳምን እት ዐድ ወለት ትገብእ እት ህሌት፤ 32 አምዕል ህይ እት ዐድ ሕጻን ጸንሐወን። ፈጅረተ ህዳይ እም መርዓት እግል መርዓውዮታት ፍንቱይ ፈጠር ተአዳሌ እግሎም፤ መርዓዊ ህይ ክም ተአምርተ ሐምዱሁ እተ ጢሾ ግሩሽ ከሬ እግላ። አሰክ መርዓናሆም ለአተሞ ህይ እምበል እም መርዓት ለትወድዩ ነብረ፤ ነብረ ብዕደት ኢበልዮ።

እት ዓዳት ወለመድ ሸዑብ ጫድ፤ ሐቱ ፍንቲት ሓጃት ህሌት። ህተ ህይ ሕጻን እት ህዳይ ሕቱ ኢሻርክ፤ እግል መልህያሙ ህዳይ ሕቱ ክም ሀለ ኢለአስእሎም ወኢለዕዝሞም። እምበል እት አግደ ሓጃት ወሐቆ ረዩም ሰኖታት እት ዐድ ሐም ሕቱ ኢገይሰ።

መርዓት አሰክ ዐድ ሐሙህ ክም ጌሰት “ርሱም አልነዝለ” በሀለት ክረያት እንዴ ኢትደፍዕ ቤተ ኢተአቱ። እት መጅተመዕ ጫድ ጸመር ህድየት ልምድት ወእጅዝት ተ። ጸመር ክም እሻረት ተጃረት ወሰምእነት ሰበት ትትነሰእ። ምስል ሐቱ ሌጠ ለነብር እበ መጅተመዕ ቅቡባምቶም። ወለ አንሶምመ ሕሽመት ኢሊህይባሆም። ለገብአ እናስ እግል ልጽመር ዶል ሰትት አወል እግለ ሐማሁ ገምየ ወህታመ ጎማቱ እንዴ ትከበተት እግለ ጸመረ ቤት ትፈንቱ በሀለት ቱ። ለበዝሐ ወቅት ህይ ለአጽመር እት ሐቱ ዘሪበት ቱ ለነብረ። ለአጀኒት ህይ እግል እሲት አቡሆም “ዐመቶ” እት ልብሎ እብ ሕሽመት ልትላከው። ለዲብ ሐቱ ዘሪበት ልትሸቀዩ አብያት ክም ቅድረት ናይለ እናስ ወብዝሐሌ አንስ ልትሸቀዩ እት ሀለዩ፤ መሰከብ አብለ ዳር ወሰነት ሰብ ለባጽሓም አጀኒትመ አብያቶም ልትፈንቱ እግሎም። ጋሻይ እት መጅተመዕ ጫድ ሰኒ ክቡር ወሕሹም ሰበትቱ፤ አሰክ አምዕል ለእለ ገይሰተ ሰኒ ልትሐደሩ። እብ ሐጫር ህግዩ መጅተምዐነ ወመጅተመዕ ጫድ እብ ሕብር ሌጠ ለኢገብአ እብ ገሌ ዓዳት ወለመድመ ልትሻቦህ።

ምን ዳያሪ ሰፈላል!!



ሰፈላል ለትብል ዘዐት ክብድት ወፋይሐት ክምተ እግል ልቅዌ ለልድዔመ ኢቀውዮ። ሰፈላል ላኪን ናይሚ? ሰፈላል ነቢር፤ ሰፈላል ረሕመት፤ ሰፈላል ለውቀት፤ ሰፈላል ሰአየት፤ ሰፈላል፤ ሻማት ሰፈላል B. S. H ሰፈላል. . . ከላስ B.S.H !!!!

አቤ ዳያሪዬ B.S.H ክምስለ ተአሚረ ሐያቼተ፤ መስተቅበልዬተ፤ ክሉተ እግልዬ። ሐያቱ፤ ሰአየቱ፤ መስተቅበሉ ለሐግለ ሀለዮቱ ተርጀመት ክም አለበ እንቲ ተአምሪ ወቁርአት። B.S.H እት እፈትዩ ወትፈቱኒ ሌጠ ለይዐለት፤ እግል ሕድ ለትከለቅነ ናይ መንፈስ ፈተሻ በሀለት soul mate ዐልነ። B.S.H ምን አዳም እግልዬ ትፈቱ ወምን ልትበለዕ kit kat.. መዕሌሽ ደያሪዬ አክለ ዘዐት ከተብኮ ምስለ እብ ዕንብዕ ሕፍን እጫቀዐኪ ክም ህሌኮ ልትፈሀመኒ ህለ። ላኪን ሚ ኢዴ ምን ቅድረቼ በራቱ። B.S.H ምን ለዐል መዐር ወእክል ሙነት ዐለት እግልዬ፤ በደል እግለ ሐግል ሀወ ምን ሐግል ለሐይሰኒ። እግልሚ ሀወ ሐቆ ሐገልክ ሐቱ ዶል እመይት፤ እክል ሐገል ለኪን ሚልዮን ዶል መዩት ቱ። አነ ወB.S.H ግሞሬ ሰበት ዐልነ፤ ምሴ ወፈጅር ምስል እንውዕል፤ ነአመሴ ወነአጽብሕ ዐልነ። ላኪን ምን ቀደም አርበዕ ሸሀር እብ ለኢተአመረ ሰበብ ምን ሕድ ትባዴነ። እብ ጀሀቼ ምን ለለአረይም ሰበብ ወለ አክል ፍሬ እድር አለብዬ። እብ ጀሀተ ላኪን ከንዶእ። ዶል-ዶል ለመልሀይቼ ዐለት B.S.H ናይ አማን አዳምተ መውሳፍ ሸክ እንብእ። እግልሚ ለናይ በዲር B.S.H እብ ክሉ ምልእት ተ። መላኢከት ተ ምን እብል ክሉ አውሳፈ ናይ መላኢከት ቱ። ላኪን ዐቅል ወሸውሀት ምስል ሰበት መልክ እት መላእከት ለሸአገት አዳምተ ምን እብል ለሐይሰ። ሓ. ዩ B.S.H !! ሰፍለልክወ።


በዲር ሰፈላል እት ልብሎ ብዙሕ ሚዛን ሀይበ ይዐልኩ። ላኪን ሰፈላል B.S.H መዐነት ወሚዛን ሰፈላል ክም አምር ሌጠ ለኢገብአ፤ እብ ክሱስ ክም እትመራመር ወእትፈላሰፍ ወዴተኒ። እለ ሚልካይት ሐያቼ ወዲን ለውቀትቼ ላተ B.S.H ክም በዲረ እግል ትግበእ ምስልዬ ሌጠ ለኢገብአ፤ ወለ ለሰበብ ለእቡ ትረይመኒ ህሌት ምን አምር፤ ምን ሰፈላል ምንመ ይአባሬ እግለ ሰፈላል ወትለመድኮ ምስል። እብ ጀሀትቼ እብ አፋዬ ልግበእ ወእዴ እኪት ዋድዩ ይኣነ። ወእኪት እግል ኢደያመ ቃሰድ ይኣነ። ምን አመረ አሳስ ሻምነ እት ተምሲል ብኩይ ዐለ እግል ይኢበልሙ፤ እብጀሀቼ አሳስ ሻምዬ እት ድርሰስት ቆሪን ልብዬ እንዴ አደርሀርኮ እሱሱ ክም አነ ምን ሀለዮቼ ወለዐል እኩድ ኣነ። ከሚቱ ለሰበብ ትበው?

ለሰበብ ምን አምር እግልሚ እት ዐዛብ ሰፈላል ወትከፊት። ዮም ላኪን ቤተ እንዴ ጌሰት እግል እሰአለቱ። በሰ ለናይ አክር ሐል ህቱ መሰል ያረቢ ሰዴኒ። ኣሕ! ሀንደጎት ልብዬ ትወሰክ ህሌት፤ ትንፋሰዬ ለሐጭር እቼ ሀለ፤ አሰራር ረኣሼ ልሳደድ ሀለ፤ የረቢ ናይ ደሐን ደዩ። ሞትመ እብሊታት ትመጽእ ቤለው። ምን ሞት ይእፈርህ እግልሚ ወለ ምን እፈርህ ምን ሰበት ኢትሰረኒ ላኪን እብ ሰፈላልዬ B.S.H እንዴ ይእረክብ ላተ የረቢ ኢትንሰኣኒ። ኣህ.... B.S.H ትመጽእ ህሌት እት እዴህ ገሌ ጸውረት ህሌት። ዕንታቼ ፈጥን እግልዬ ደሀለ ያረቢ አግርም ዲብዬ ለአውረሐት ጸውረ ዐልኮ ሰፈላል ዮም እንዴ ከለለት ተህጅል ዲብዬ ለህሌት ትምስል። B.S.H ተሐልፍ ህሌት መ ናይ በዲረ እንዴ ሐሰበት አሰክዬ ተአለውሞ ህሌት ተ. ተ. ተአለውሞ ህሌት።

መሸአለህ ለናይ በዲር ሰሐቃዩ ትሰሐቅ ህሌት። ምስል ፍትሕተ ከናፍረ ወጣነ አንያብ፤ ባብ ሰአየቼ ልትፈተሕ ክም ሀለ ልትሰምዐኒ ሀለ፤ ሐቀፍክወ ሐቅፈተኒ እብ ብካይ ለተለ አክራን፤ ናይለ ሰበቡ ለኢተአመረ መትራያምነ ዐፎ ልሰዕ ሀለ። ፈርሐት ክም ሐለት ከርሀበት እት አልባብ ክልኢትነ ወሐዘት።

ኣሕ! እብ ብርድ አገርሰ ህሌት፤ B.S.H አየ ጌሰት? ለእብ ነዳይቼ ክቡብታት ዐለዩ ሓምላት እደየተ ዶል ጠለቀያኒ? ለእተ ሸምለ ጭገረተ እንዴ ነሽበ ለመፈተይ ርይሐተ ለአዳውር ለዐለ አንፍዬ እበ ጌሰት ምን? ለእት ሕድ እንዴ ነሽበው ሀንደጎት ሕድ ለአዳውር ዐለው ለልባብን ዶል ትፈናተው? ኡይ. . . አነ ዕዩን ህሌኮ መፋዋን? ወኖሱ እት አየ ህሌት? ሚቱ እሊ ለገጩ ግልቡብ ሀለ? በጣንዩት? ናይ ሚዶል በጣንዩት? ውሸ እት ዐራት እሰክብ ህሌት? ሕልምቱ? የሬት ምን እሊ ሰካብ እሊ ወኢትነፍዝኮ ሕልምዬ እግል አተላላ። ኣሕ ሰፈላል እለ ቀላለተ።

Moደ



ጅግራታት መዳርስ ምዴርየት በሪኽ

ፈርዕ ተዕሊም ምዴርየት በሪኽ፡ “መዳርስን አሳስ ርዶደት ዐድነ” እት ሐንቴለ ልብል ሸዓር ወድዩ ለአቅዩመ ዮም 3 አክቶበር ለአንበተዩ ወእግል መደት ሰለስ ወሬሕ ወሰር ለአተላለዩ ጅግራታት ኮበሪት እግር ወሾሊቦል፡ ለሐልፈተነ ሰንበት ንኢሽ አትመመ።

እትሊ ዝያድ ሰለስ ወሬሕ ለገብኦ ጅግራታት፡ 15 ናይ መአንብታይት ደረጃት ወሐምስ ናይ ምግባይት ደረጃት መዳርስ ሻረከዩ። እብ ዓመት ህዩ፡ 598 ርዶደዩን መአንብታይት ወምግባይት ደረጃት እግል ክልኢቱ ተብዕን ወአንሳት ጅንስ እብ ደረጃት ክላስተር ወምዴርየት አትጃገረ። እብ አሳስለ ገብኦ ጅግራታት ህዩ ፍገሪት ክእነ ተ’ሌ ትመስል፡-

- ** እት መአንብታይት ደረጃት ምን ፅምር 10-11 ውላድ እት ኮበሪት እግር ፍገሪቶም ክም እሊ ለተ’ሌ ዐለት፡
 1. መድረሰት ጸዳዱ
 2. መድረሰት ተኽሌ ዐገበ
 3. መድረሰት ዐዲ-ሸማገሌ
- ** እት መአንብታይት ደረጃት ምን ፅምር 10-11 አዋልድ እት ኮበሪት እግር፡ እሊ ለተሌ ነታይጅ ትረከቡ፡
 1. መድረሰት ጸዳዱ
 2. መድረሰት ዐዲ-ገብሩ
 3. መድረሰት ወኪድባ
- ** ምን ምግባይት ደረጃት ፅምር 12-13 ሰነት ውላድ እት ኮበሪት እግር፡ ለፍገሪት ክእነ ትመስል ዐለት
 1. መድረሰት ደቂተሸም
 2. መድረሰት ተኽሌ ዐገበ
 3. መድረሰት ዐዲ ገብሩ
- ** ምን ምግባይት ደረጃት ፅምር 12-13 ሰነት አዋልድ እት ኮበሪት እግር፡ ፍገሪተን ክምስል እሊ ዐለት፡
 1. መድረሰት ደቂ ተሸም
 2. መድረሰት ተኽሌ ዐገበ
 3. መድረሰት ዐዲ-ገብሩ
- ** ምን ምግባይት ደረጃት ፅምር 12-13 ሰነት ውላድ እት ሾሊቦል፡
 1. መድረሰት ደቂ ተሸም
 2. መድረሰት ሚናዘርኣይ
 3. መድረሰት አፍራይት
- ** ምን ምግባይት ደረጃት ፅምር 12-13 ሰነት አዋልድ እት ሾሊቦል፡
 1. መድረሰት ደቂ ተሸም
 2. መድረሰት ተኽሌ ዐገበ
 3. መድረሰት አፍራይት

ሚሲ 400 ጎል እት ላሊገ

ቀደም ማሌ እት ገብኦት ትልህዩ ላሊገ ሰፕይን፡ ፈሪቅ በርሰሎን እግል ኤባር 3፡0 እት ለቀልበ ዲበ መናሰበት፡ ልዩኔል ሚሲ ዕልብ 400 ጎሉ እት ጅግረ ላሊገ ሰጀለ።

ምን 435 ናይ ሊግ ትልህያታት፡ እሊ ዐደድ አግዋል ለበጽሐ ሚሲ፡ እት ታሪክ ውቁል ደውሪታት ኮበሪት አርብ ሰልፋይ መተልህያይ (እት ምሮ ሊግ በሀለት ቱ) እንዴ ትበሀሉ፡ ሕሽመት ራክብ ሀለ።

ክርስትያኖ ሮናልዶ፡ እት 507 ትልህያታት እንግሊዝ፡ ሰፕይን ወኢጣልያ፡ 409 ጎል እግል ልሰጅል ቀድረ።

እምበለ ሚሲ እት 53ይት ደቂቀት ለሰጀለዩ ጎል፡ ሰዋሬዝ እት 19 ወ59 ደቂቀት፡ ክልኦት ጎል እንዴ አትዐረ፡ ፈሪቅ በርሰሎና እብ ፋዩሕ ክም ቀልብ ዋድያሙ ሀለው።

እት 19ይት ሳምንቱ ዕዱይ ለሀለ ጅግራታት ላሊገ-ሰፕይን፡ በርሰሎና እብ 43 ንቅጠት ዋለ-ሕሳሉ ጽብጠት ህሌት። ክምለ እትለ ተ’ሌ ሰቡረት እንርእዩ ለህሌን ህዩ ደርብ በርሰሎና 2ይ ተርቲብ ጽብጥ ለሀለ ፈሪቅ አትሌቲኮ ማድሪድ እብ 38 ንቅጠት፡ 3ይ ደረጃትመ ህዩ ፍሪቅ ሴቭየ ወርያል ማድሪድ ክል ምኖም 33 ንቅጠት እንዴ አክኦለሉ፡ እብ ፈርግ ጎል ሳልስ ወረቤዕ ተርቲብ እቱ ግሱያም ሀለው።



ተርቲብ ላሊጋ ሰፕይን እትለ ሳምን

- ለሰልፋያት ሐምስ ፍሪቅ ላሊገ እትለ ሳምን ህዩ ክእነ መስለ፡-
- 1. በርሰሎና =43 ንቅጠት
 - 2. አትሌቲኮ ማድሪድ =38 ንቅጠት
 - 3. ሴቪላ =33 ንቅጠት (ወእብ ዝያደት ጎል)
 - 4. ርያል ማድሪድ =33 ንቅጠት
 - 5. አላቬስ =32 ንቅጠት

ደህዩ ፕሪመር-ሊግ እት 22ይት ሳምንቱ



እትሊ ለሐልፌን ሰነብት ምን ገብኦ ወሐቆሁ፡ ፍሪቅ ፕሪመርሊግ ብዙሕ ትልህያታት ወደ። እሊ ህዩ ለእግል ልትመም ናይ ሳምናታት ወቅት ታርፋ ለሀለ ጅግራታት ፕሪመርሊግ 2018/19 እቱ ለሐስ ንቃዋ እንዴ ረከብከ እግል ሐሊፍ ቱ ገብኦ ለአስመን።

እብ አሳስ እሊ ሰንበት ንኢሽ ሊቨርፑል እግል ብራይቶን፡ መሐመድ ሰለሕ ሐቆ ዕርፍ እት በገይዳት እበ አተዩ እሉም ጎል-ሪጎሌ 1ኡበ0 እንዴ ቀልቡ፡ ምን ደርቡ ለሀለ ፈሪቅ ማንቼስተር ሲቲ፡ እብ ሰቦ ንቅጠት እት ርሽመት ፕሪመርሊግ ሻንን ሀለ። ሰበት እሊ መሐመድ ሰልሕ ወአቡሚያንግ 14 ጎል እቡ ፕሪመርሊግ መርሐ ለሀለው ሀዳሬን ቶም።

ቼልሲ እግል ኒውካስል 2፡1 እንዴ ቀልቡ፡ 4ይት ደረጃቱ ሕጡጥ ሀለ። ምን ሰንበት ንኢሽ ለዐለ ትልህያታት፡ ለድቁብ ፈሪቅ አርሰናል ዌስትሃም እንዴ ትለከፈ ዲቡ 1፡0 ሰበት ቀልቡ፡ አርሰናል እት ልርእየን ሰለስ ንቅጠት ምን እዳሁ መልሸዩ። ለነኦሽ መተልህያይ ዌስትሃም ዴክላን ራይስ ቱ ህዩ እግል አርሰናል ለአድነ ጎል ለሰጀለ።

ሳውዛምፕቶን እግል ሌስስተርሲቲ 2፡1፡ ዋትፎርድ እግል ክሪስታል ፓላስ በርዱ 2፡1፡ በርንሊ እግል ፋልም 2፡1፡ ካርዲፍ ወገደርስፊልድ ህዩ 0፡0 ትፈናተዩ።

ሰንበት ዐባይ እት ተለ ጅግራታት፡ ኤቨርቶን እግል ቦርኔማውዝ 2፡0 ቀልብ እት ሀለ፡ ማንቼስተር ዩናይትድ እግል ቶትንሃም 1፡0 እንዴ ቀልቡ፡ ንቃዋ ምንመ ነዝዐ ምኑ፡ ምን ናይ ሳልሳይት ደረጃቱ ላቱ እግል ለሀርብቡ



ሰቡረት ተርቲብ ፕሪመርሊግ እት 22ይት ሳምንቱ

ደረጃት	ሰሚት ፈሪቅ	ምን --- ትልህዩ	ንቅጠት
1 ^ይ	ሊቨርፑል	22 ትልህዩ	57
2 ^ይ	ማንቼስተር ሲቲ	21 ትልህዩ	50
3 ^ይ	ቶትንሃም	22 ትልህዩ	48
4 ^ይ	ቼልሲ	22 ትልህዩ	47
5 ^ይ	አርሰናል	22 ትልህዩ	41
6 ^ይ	ማንቼስተር ዩናይትድ	22 ትልህዩ	41
7 ^ይ	ዋትፎርድ	22 ትልህዩ	32
8 ^ይ	ሌስስተር ሲቲ	22 ትልህዩ	31
9 ^ይ	ዌስትሃም	22 ትልህዩ	31
10 ^ይ	ኤቨርቶን	22 ትልህዩ	30
11 ^ይ	ዎልቭስ	21 ትልህዩ	29
12 ^ይ	ቦርኔማውዝ	22 ትልህዩ	27

ሀቡይ መካከ



መካከ አገድ ለትለምድ ሀቡይማ ተ። ለአካህ ምን ገብእመ ትፍህመከ ወለእለ ሐዘክ ሓጀት ተአመጽእ እግልኩ።

ሀቡይ ማካክ፡ ድራሳት ክምለ ለሐብሩ፡ ሐንገለ ምስል ሐንገል ወድ አዳም ለልትማሰል ወእብ ፍድብናሃመ አዳም ለትሸእግ ሀቡይ ተ።

ሀቡይ መካከ እት ህንድ፡ ምደንማር፡ ኔፓል፡ ባንግላዲሽ፡ ፓኪስታን፡ ቬትናም ወቻይነ እብ ብዝሐ ህሌት። ለሰኔተ ህዬ፡ እት ለቀረ ምድርመ እግል ትንበር ለትቀድር ሀቡይ ተ።

ሀቡይ መካከ መሐበራይት ሀቡይ ሰበት ተ፡ ምስል አዳም ፅላቀተ ትርድት ተ። እት ኣሰየ እት መጣዕም እንዴ አቱት፡ ምን ተረርፍለ አዳም ተአትናዋዋ። ህሙል ለረኤቱ በዐል መዋዕም ህዬ፡ ነብራሁ ትሰርቅ ምን ከክባባይ አሰክለ ድበዕ ትገብእ እበ። ለነብረ ጽብሐ ሐምሌ ገብእ ምን ገብእ ዝያድ ትፈትዩ።

አራንሾኒ ለበ እት ገብእ፡ ገሌ ጸዓዲ፡ ሐዊት፡ ጸላይም ወፈጩሕ መካከ ክም ህሌትመ እሙር ሀለ።

ሰበት እሊ፡ ንዋይ ኢትሃጅም። ሀቡይ መካከ፡ ኣዘንብተ ረያይም ወምስል አዳም ፅላቀት ለባ ተ። አዳም ለነብሩ ባካት ምን ወርረ ወዐዱህ ላቱ አወንን ናጊ ሰበት ተ፡ እት ዘሪበት አዳም ለባቅል ዕጪይ ገናዳታት እቱ ትትዓረግ ከትትመዬ።

እት ግብለት ኣሰየ ለትነብር ሀቡይ እት ገብእ፡ ዲብ ድበዕ ወዝላም ብዝሕት ለብእቱ ባካት ለትነብር ሀቡይ ተ። እለ ሀቡይ እለ ፍሬታት፡ አቀዋፍ፡ እክል፡ ዕንባባ ወመልቀም ናይ ገሌ ዕጪይ፡ ክምስልሁመ ሐምሌ ወአቅሩድ ዕጪይ ኢጉብእ ምን ገብእ፡ ሰገ ኢትብሌዕ።

እለ ሀቡይ እሊ፡ መብዘሐ ሕብር

ሰእልል ሐቆ ብከ ከአፎ ትወርክዩ?

ሰእልል ምርት ምን እት ዐባዩ ልግበእ ወነኣይሽ ውላድ አዳም ለልትረኤ ፍጹግ ቀሌዕ ተ። አሰባቡ ብዞሕ ክም ቱ ሐካይም ለሐብር። ለበዝሐ ሰእልል እብ ፋንገስ መጽእ። እግሉ ለልክዱ ምን ሕበር ብዞሕ ለልትዳሌ ቀመም እብ ሐካይም ልትሀየበኩ።

ላኪን እተ ሐኪም ለአለቡ እቱ ድዋራት፡ ለሰእልል እት በዜሕ ዲብከ ገይሰ ሀለ ምን ገብእ፡ እግለ እሰልፍ ለፈግረት እትከ (እም) ሰእልለት ሸሙይ አሌልዩ። እት ሰር እግል ኢትሀሌ ተአከድ ምን። እት ምለዐል ክተፍ ገርብ ህሌት ምን ገብእ፡ እግለ እም ላተ ሰእልለት እብ

ላመት ምን ቅርደ ብተኩ። ሐቆህ ትክስ አብለ። ከሉ እት ገርብከ ዝሩእ ለሀለ ሰእልል ሐቆ ሳምን መሳክቡ ብራቁ እግል ልግበእ ምንካ ተ።

ላኪን ለሰእልል ዐባዩ ገብእ ምን ገብእ፡ ቅርድ ድሀር ሰበት ለሀሌ እሉ፡ ግያሰ አሰክ ሐኪም እግል ለአትሐዜካ ተ።

ርክን ሰወር

እሊ ድጌ ዲብ አቅሊም ዐንሰበ ህለ መዲብ አቅሊም ቅብለት በሐር ቀየሕ መሰለኩም?



እሊ እንርእዩ ለህሌነ ድጌ የምክ እብ ሸክል አብያቱ ዲብ አቅሊም ዐንሰበ ለህለ መስል እትነ ገብእ። ላኪን ዲብ አቅሊም ቅብለት በሐር ቀየሕ ህለ። ከእሱወ ድጌቱ ምን ትብሎ ህዬ፡ ድጌ ነቅፋ ቱ። ድጌ አው መዲነት ነቅፈ እት ሰነት 1933 እሊ ሸክል ዐለ እሊ። እተ ወክድ ለህይ እምበል ምር ሰፍ ወእሊ እብ ዕጪይ ቅልንቃል ክሉብ ለህለ ተክልብ ብዕድ አብያት ይዐለ ዲበ።

ከመዲነት ነቅፈ፡ የም ሐቆ 86 ሰነት እሊ ኣዜ ጽብጠቱ ለህሌት ሸክል መዲነት ጽብጠት ህሌት።

ሕድት ኖሱ ቀብብ፡

ብዝሕት ጸሩ ኢረክብ

እሰልፍ እለ ክልኤ ሳምን ህሩሳም ምን ለህሌነ ሰነት ሐዳሰ 2019 ሰነት ኬር ወበርከት እግል ትግበእ እግልነ እብለኩም። እት ዐድ ወካርጅ ለነብር ሳቡት ሸዑብ ኤረትርየ እብ ዓመት ወእብ ፍንቱይ ወቅዋት ድፍዑ፡ አሰናይክም ለሰለሰ መነቲት እግል ሄራር ገጽቀደም ትግራይት ለዕንዱቃት፡ ለትከትብ ጀሪደት፡ ለትአሰሚዕ ራድዮ ወለተአርኤ ተለፍዝዮን።

እለን ምን አርት ርሕም ለአብሀዘዩ መነቲት ህግዩ ትግራይት ሰበት ተን፡ እግል አንፋረን ዐቦት፡ ተጠውር ወግፍየት እተምኔ እሉም። እንዴ ኢልትሐለሎ እግል ተጠውርነ ላለ ወአምዕል ተርሆ ለህለው። እሊ ክቱብዬ ህዬ ምስልኩም ሼቅየትለ መነቲት ተሐይሰ ተሐምቅ ምን እብል እቡ እንዴ እቤ እነድኡ ሰበት ህሌት፡ እብ ነሐር ፋዬሕ ክም ትትከቡቱ ሰእየቼ ዐባይ ተ።

1. ዲብል ጌማም በራምጅ ሰነት ደግም (2018) ለዐለ ውበዕድ ገሌታይ እግል ኢበል ሰምሖ እልዩ። ዲብ ዮም 18 ዲሰምበር 2018፡ ምን ሰነብ እንዴ ሐሶሴት ራድዮ ክም ፈትሐኩ፡ ምን አፍለ መዘዕ “ምደርሲን ህለው ወእሎም ለመሰሎ፡ ትግራይት ሚ ትነፈዕ ወሚ ወቀይ በ እንዴ ቤለው ጀሪደት ለኢልትዛበው” ለትብል ሕሰበት ሰምዐኩ ምን። ላኪን እንቱም ምን በሊሰ ዲብል አትዐገቦት ኣዘም ሰበት ሐፊኩም፡ አነ ህዬ እግል እዘም ሰበት ኢጉብአት እግልዬ፡ ክእነ ለተሌ አሰምዎም።

የሀው እንቱም ለእግል ህግዩ እምኩም ሸላሊት ትቀቦ ወትክጅሎ ምን ለህሌኩም፡ ጆግራፍ ምድር ዳርሳም ይእንቱም ገብእ? ተእሪክ ቃረት አፍሪቀ ዶል ትርኡ፡ ለበዝሐው አዳመ እብ ህግዩ ሰልፋ እብ ፈረንሳይ፡ ላቲን፡ እንግሊዝ ወሰዋሐሊ ልትሃጌ ወከትብ እት ሀለ፡ ምናተ ትግራይት ለሾክት ሕልቅም ጋብኣም እተ ለህሌኩም፡ እብ ብዕድ ሀገጊት ለደረሰኩም እግል ትግብእ ትቀድር፡ ምናተ ሕድት ኖሱ ቀብብ፡ ብዝሕት ጸሩ ኢረክብ፡ ክምሰለ ልትበህል፡ ለሀገጊትለ ጸርኩም ከማን አላህ ዓልም ተአሙሩ ኢመሰለኒ። ሰበቡ ህዬ፡ አክል-ሕድ ታሪክ ተጠውሩ ዶል ትርኡ፡ ሰብኡ፡ መትሃግዩቱ ወሰብ ጸሩ ምስል እንዴ ትሳደ ለጠወረዩ ሀገጊት ቱ፡ ከሉ እሊ ዮመቱ እት እዲነ ለትወቀለ አካናት ጸብዋ ለሀለ። ትግራይትነ ህዬ እብ ሕሩፍ እመ ግእዝ ምን ዘበን ቅዱም ትትከተብ ለጸንሐት ተ። ከአፎ ኣዜ ክም ህግዩ ሐዳሰ ነዐልበ? እት አፈች እማትነ ወአበውነ ህዬ አክል አዩ ሰኒን እድውርት ተ ገብእ? ከእንቱም ለእብ ሀገጊ ብዕድ ዳርሳም፡ ትግራይት ሐቆ ኢተአትሐዜኩም፡ እት ቤትኩም ምስል ዐይለትኩም ወዲብ ሱግ ምስል መልህደምኩም እግል ሚ ትትፋህሞ እበ ህሌኩም? “ኢትነፈዕ” ለልቡለ ህግዩ፡ እግል ትትፋህም፡ ትከተብ ወትቅረእ እበ ለኢትቀድር ተ። ትግራይት ላኪን እሊ ዐረዱ ውሓልፈቱ ተ። ረቢ ፍርሆ ወምን ህግዩኩም ኢትትነውነው! ለተአሙሩ ሀገጊት ብዕድመ እት ረኣሰ ትግራይት አመርኩሙ፡ ወሰልፍ አፋኩም እብ ትግራይት ፋትሓም እንቱም ለዐጃይብ ህዬ። “እብከ ለልዐቤ፡ ከአፎ እልከ ለአቤ?” እበ ለትፈትወ ህግዩ እት ትትፋህሞ እግል ትንበር ህዬ ትቀድር ገብእ? ሐሰት! ለኢወለድካህ ውላድ ኖሰ ሰበት ኢጉብእ፡ አነ ላቲኒ፡ ለብዕድ ሀገጊት እት ረኣሰ ትግራይትኩም አሙሩ ድኢኮን፡ ትግራይትኩም ጀላህ እግል ትልከፎ ላቲኒ ኣሰ ወጸደፍ እቡ ትደኖ ህሌኩም መስል እቼ።

2. ክል-ዶል ዲብ ጀሪደት ኤረትርየ ሐዳሰ ምን አንበተት፡ እግል ሔልየት ሰብ በዲር ለሐልዩቶም ርክን እንዴ ሀብቱ እት ሰፍሓት ተአፈግር ጸንሐት ወህሌት። እግለ ኣዜ ምለዐል ምድር ለህለውመ ሕላዮም ሰፍሐት እንዴ አጠጠሐት እሊ፡ ኢተአፈግሩ? ናይ ኣዜ አበውነ ወእማትነ ህዬ ሕላይ ትግራይት ኢለኣምር - ሕላይ ኢተላትሎ ወለሸለሐ ዲብኩም? ሓሸዕ፡ ሸልሔ ላቲኒ፡ እት አፍ መትሃግዩት ትግራይት ኢጸንሐኩም! ወእንቱ'መ ሸልሐት ኢትሰእወ ምኖም። ሰበት እሊ፡ እሉም ሔልየት፡ ሽዐረእ ወኬትበት፡ ትውሐድ ወትብዘሕ፡ ትክፈእ ወትገርም፡ ክል ምርት ቅድረቱ ወዘበኩ ሰበት መርሖ፡ ንሰኦ ምኖም ወአፍጉር እግልኩ። ሰበቡ ሕያይ ምን ማይት ሰበት ልትፈደል። ሐሬ ለፈን አትጃግርካህ ምን ገብእ፡ ለሕምቅናነ ዲብ አዩ ክም ሀለ፡ ምን ሕዉዝ አሸግር አበችነ ወእማትነ ለቀዳምያም እግል ንድረሰ እንቀድር። እትሊ ወክድ ኣዜመ ለእንደርሰ ምኖም መብህለት ፈን ሐዳም ኢመሰሎ እቼ - ለበክት ምን ልትሓዎሎ!

3. አትፋግዖት ሰኒ እት ሀለ፡ እት ድግም ለአተርግዝ ሀለ፡ ምን ጀህት ጀሪደት እት ራድዮ ለልሐልፍ ከለልትጠለቅ ሰበት ቱ፡ እተ መደት ለቅድምት ሰኒ መትሰሕቃይ ዐለ፡ ነሰፍ ክምለ ሐዜት ምን ዋዕሙ ትነሰእ ሰበት ዐለት፡ ኣዜመ ለልኣትሰሕቅ ንካት ወተማሲል አብዝሐ ዲቡ።

4. ርክን ሸባባት፡ እሰልፍ ሸባባት ለትብል ዘዐት፡ ዲብ ትግራይት ይህሌት ወዐረብ፡ እግል ምር -single “ሻብ” ወእግል ብዝሓም -plural “ሸባብ” ቱ ለእንብል ድኢኮን፡ (ባባት ኣለበ ወጣቃት!) ሚ ትረክበኩም ህሌት። ምን ዝሕረት ትግራይትነ ለሰኔት ወእት አፈች እማት ወአበው፡ ሐው ወሐዋት ለዕጋል ለትጸኔሕ ክም መንደሊታት፡ ሸባን ወሸመንክሊታት ውበዕድመ እግል ለህሌ እለ ሰበት ቀድር፡ አፎ ምን ይእነሰእ? አውመ ህዬ አፎ አባጽሕት ይንብለ (በህለቼ ትግራይት ምንዲ ነሐንፍሉ፡ ሰኒ ታጅረት ተ...)።

ከዲብ እለ ሰነት ሐዳሰ ለትሐሰቡ በራምጅ ሐዲሰ፡ አተምበሊቱ ለአብለዐኒ ወመትካፍላይ ዝሕረቱ ሊዳኒ እት እብል፡ ጌማም ብዕድ እቡ አሰክ ንትዋጀህ፡ እግል ዮም እትለ ከፊኒ፡ እብ ድግማን ሰነት ኬር ወበርከት፡ ወሰነት ዐቦት ወረሀየት!

ሐመኖር ዑመር (ቤኒ)
ምን ግንደዕ